

## **KOPI MO FAASAOSAOGA TALAFEAGAI A SUI USUFONO**

### **ASO TOFI, 27 AOKUSO 2015**

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

### **MALELEGA MAI LE AO O LE MALO**

*Na fofogaina e le Fofoga Fetalai Malelega Mai Lana Afioga Mamalu, O Le Ao o le Malo.*

#### **1. “TUSI mo:**

##### **Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoaofa Faitulafono e iloiloaina ai le Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o Faiga Palota (Nu.5) 2015.

**TUUIINA ATU** i lou nei Lima i lena Aso Lulu, 26 o Aokuso i le tausaga 2015.

**(Sainia): Tui Atua Tupua Tamasese Efi**  
**O LE AO O LE MALO.**

#### **2. TUSI FAAMAONIA O LE TULAGA FAANATINATI**

E tusa ai ma aiaiga o le Tulafono Tumau 99(2) **O AU, TUI ATUA TUPUA TAMASESE EFI, O LE AO O LE MALO,** ua ou tuuina atu nei le Tusi Faamaonia o le Tulaga Faanatinatu o le Tulafono Tau Faaofi ua faaali atu iinei mo le tagofia e le Fono Aoaofa Faitulafono i lana Fonotaga o lo o faagasolo nei.

1. Tulafono Tau Faaofi o Teuteuga o le Tulafono o Faiga Palota (Nu.5) 2015.

**TUUINA ATU** i lou nei Lima i lenei Aso Lulu, 26 o Aokuso i le tausaga 2015.

**(Sainia): Tui Atua Tupua Tamasese Efi**  
**O LE AO O LE MALO.**

### **SAUNOAGA O MALIU**

*Na faasilasila e le Fofoga Fetalai le tuumalo o le **Afioga LEILUA Punivalu**, o Le sa avea ma se tasi o sui usufono o le Palemene mo le Itumalo Faaalaalafaga o Falealili. Na tuumalo o ia i le aso 14 Aokuso 2015.*

*Na uluai filifilia mai le **Afioga LEILUA Punivalu** i le Palemene Lona IX i le 1985-1988. Na toe filifilia mai o ia i le Palemene Lona XII i le 1996-2001.*

*Sa avea o ia ma sui usufono o le Komiti o Tulafono Tau Faaofi, le Komiti o Tulafono Tumau ma le Komiti o Tulaga Aloaia ma Amio Tauloa a le Palemene i le Paeaiga o le 1985-1988.*

*Ia e avea ai ma sui o lenei Palemene e molimoli atu faamafanafanaga ma faamaisega i le aiga alii, le faletua ma le nofo a alo aemaise o le Itumalo Faaalaalafaga, ona o le toesea o le Tama.*

*Na tutulai filemu le Maota mo le minute e tasi e faailoa ai lo latou faaaloalo i le sui usufono ua tuumalo.*

**FOFOGA FETALAI:** I lou agaga faaaloalo tele ou te momoli atu ai le faafetai tele i le paia ma le mamalu o le tatou Maota ona o tatou tu ma aga masani e ala i faaaloaloga ona o le valaau paia a le Atua. O se tasi foi o le sa auauna i lenei Maota i tausaga e tele, e le mafai ai ona tatou tuua le tatou tulaga masani, o le tatou valevale alofa mulimuli i le auaunaga a lea foi tamalii o le atunuu aemaise foi le fai ai o ia ma sui o lea itumalo o Falealili. E momoli atu ai le faafetai tele ona o la outou faaaloalo le tulai faaaloalo i lenei taeao fou.

Ou te faatalofa atu ma ou ofo alofa atu i le paia ma le mamalu o le tatou Palemene i lenei taeao fou, i le alafai mai i faguga lelei sui usufono mamalu uma o le tatou Maota i lau Afioga i le Taitai o le Malo aemaise lau Kapeneta mamalu, lau Afioga i le Taitai o le Itu Agai aemaise le paia o sui usufono mamalu uma o le Maota Fono. Faamalo atu le onosai, faamalo le tauatai i lenei aso. E manatu sa tatou valavala i nai aso ua tuanai atu ona o le faaauauina pea o tatou galuega masani, e fai foi o le faalau i lau Afioga i le Taitai o le Malo ma lau Kapeneta, aemaise foi o a outou Afioga i Taitaifono ma Sui Taitaifono o Komiti eseese Faapalemene, sa papaaveloa ai le tatou galuega i nei vaiaso ua tuanai atu, malo le tauatai, faamalo le galulue,

faamalo le onosai o lea ua tatou taunuu mai i lenei taeao fou ona o le faaauauina o le tatou galuega. E i ai le talitonuga, e faapena lo tatou valaauina, e leai se agaga tatou te faavaivai ona ua tatou faaauauina pea lo tatou valaauina i lenei Paeaiiga, ua toe o se aga, ia ae talitonu o lo o vaaia pea ma le agaga fiafia lo outou taupati mai ma lo outou naunau mai aua le faaauauina o a tatou galuega. E ui lava ina tele a tatou tuatuaanoa i a tatou feau ma tiute a le tagata lava ia i totonu o le lotoifale faale-Itumalo ma le ekalesia, o totonu o le Malo ma aiga, ae o lo o matauina pea lo outou faamalolosi mai i le tatou galuega.

E faapai atu i le tapuaiga a le tatou atunuu i ona tulaga faalupelupe Samoa, mai lava i Lana Afioga Mamalu, O Le Ao o le Malo ma lau Masiofo, Sui o le Fono a Sui Tofia ma lau Masiofo, aemaise foi le paia o le Tafatolu o Faigamalo tau agai i lau Afioga i le Faamasino Sili ma le Ofisa o Faamasinoga, aemaise Faauluuluga ma Taitai o Faalapotopotoga a le Malo ma e o lo o galulue i totonu o le tatou Malo. Malo le onosai.

O le tapuaiga foi aua Samoa i ona tulaga lautetele i ona paia ma ona mamalu aua le Usoga a Tumua ma Pule, le paia i Aiga ma a latou Tama, o Tama ma Aiga, e talitonu le faamoemoe, e manuia faiva o lau Palemene ona o lau tapuaiga.

E le mafai foi ona faagaloina le tapuaiga a le la itu o le vai i le tatou Motu i Sasae i le paia o le Faigamalo i lau Afioga i le Kovana Sili ma le Lutena Kovana, i lau Afioga i le Peresetene ma le Fofoga Fetalai ma sui uma o sui o le Faigamalo, Tutuila ma Manua, ia o tatou lava o le lauti ua uma ona laulelei i le faataoto ai i lenei itu o le ta aiga, ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua.

Ia lenei taeao le tatou Palemene, ia o lea ua tatou toe aofaga potopoto i lenei aso ona o le faaauauina o tatou galuega, e i ai le talitonuga o le Fofoga Fetalai e le umi foi le tatou Fono i lenei vaiaso, ona o tulaga o galuega ona o nisi o tatou Tulafono Tau Faaofi taua e tatau ona faamaeaina, a o le tatalo lava ia a le Fofoga Fetalai, e ala lava ona uumi a tatou Fono o a outou Afioga.

E avatu pea le agaga o fautuaga, ia seu pea le manu ma tagai i le galu. O le Maota nei e le o se Maota e tiutalalao, o le Maota e tiutalatala, aua e faigata le auafamau o Samoa o le ia e iviivia e leai se isi e soona autalaina. Ia ae lafo atu pea o lo o i ina le tofa ma le faautautaga, e tatou te oloolo pitovaa ai ina ia manuia mea uma e tusa ma le tatou polokalame ua uma ona faataatia mo le faamoemoe o lenei aso.

## **TUUNA ATU O PEPA**

*Na tolaulauina e le Failautusi Pepa ua faataatia i luga o le Laulau a Fono, e tusa ai ma le T.T.48.*

1. P.P. 2015/2016 Nu.43, Lipoti a le Ofisa o Komesina o Sulufaiga i le Tulaga o Aia Tatau a Tagata Soifua 2015.
2. P.P. 2015/2016 Nu. 44, Lipoti o le Usugafono i le Fonotaga Lona 46 a Fofoga Fetalai ma Failautusi o Palemene na usuia i le aso 5-9 Iulai 2015, Hobart, Tasmania.
3. P.P. 2015/2016 Nu.48, Lipoti Faaletausaga a le Pulega o Tagata Tafafao Maimoa 2013-2014.

4. P.P. 2015/2016 Nu.50, Lipoti a le Usugafono i le Malaga Asiasi a Fofoga Fetalai o Palemene o le Pasefika i le Maota o Sui o le Palemene a Niu Sila, Ueligitone, Niu Sila, aso 24-25 Iuni 2015.

#### **TUUNA ATU O LIPOTI A KOMITI FILIFILIA**

*Na tolaulauina e le Failautusi Lipoti a Komiti Filifilia ua faataatia i luga o le Laulau a Fono, e tusa ai ma le T.T.51.*

1. P.P. 2015/2016 Nu.45, Lipoti a le Komiti o Mataupu tau Faamasinoga i le Tulafono Tau Faaofi o le Ofisa e Faafaeina Moliaga tau Solitulafono 2015.
2. P.P. 2015/2016 Nu.46, Lipoti a le Komiti o Mataupu tau Faamasinoga i le Tulafono Tau Faaofi o Teuteuga o le Tulafono o Tamaiti 2015.
3. P.P. 2015/2016 Nu.47, Lipoti a le Komiti o Mataupu tau Faamasinoga i le Tulafono Tau Faaofi o Teuteuga o le Tulafono o Galuega tau Leoleo 2015.
4. P.P. 2015/2016 Nu.49, Lipoti a le Komiti o Mataupu tau le Va i Fafu i le Tulafono Tau Faaofi o Teuteuga o le Tulafono o Tupe Teufaafaigaluegaina mai Fafu 2015.

#### **LAFO MO LE FAATAATIAESE O TULAFONO TUMAU**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI (Palemia):** Lau Afioga i le Fofoga Fetalai ua uma ona e saunoa faatulima ma faalaeiau i le mamalu o le Maota nei faapea foi le atunuu o lo o faafogafoga mai fai lena mo tatou. A o lou tulai atu ma le agaga faaaloalo e faatu le lafo, *Ina ia faataatiaese nei Tulafono Tumau 106 ma le Tulafono Tumau 107(4), ina ia avanoa ai le Iloiloina Auiliili ma le faitauga faatolu i le aso fono lenei ia Tulafono Tau Faaofi ia ua lipotia mai e Komiti Filifilia i le aso lenei.*

*Faaluaina e le Sui Palemia, Pisinisi, Alamanuia ma Leipa, Minisita mo Galuega tau Alamanuia ma Atinae a le Malo, Minisita mo Fesootaiga ma Faamatalaga Tekonolosi.*

*Na faamaonia le lafo ma tulai ai Tulafono Tumau 107(4) ua faataatiaese.*

#### **TULAFONO TAU FAAOFI O TEUTEUGA O LE TULAFONO O FAIGA PALOTA (NU.5) 2015 – faitauga muamua**

**Afioga Hon FIAME NAOMI MATAAFA (Minisita mo Faamasinoga ma Pulega tau Faamasinoga ma le Komisi o Faiga Palota):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau*

*Faaofi o Teuteuga o le Tulafono o Faiga Palota (Nu. 5) 2015 i lona faitauga muamua.*

*Faaluaina e le Sui Palemia, Pisinisi, Alamanuia ma Leipa, ma le Minisita mo Galuega tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga muamua.*

## **TULAFONO TAU FAAOFI O TEUTEUGA O LE TULAFONO O FAIGA PALOTA (NU. 5) 2015 - faitauga faalua**

**FOFOFGA FETALAI:** Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu i Le Ao o le Malo i le Tulafono Tau Faaofi lenei, o lea o le a sagai atu loa le Fono Aoa o le faitauga faalua.

Tulai mai lau Afioga i le Minisita mo Faiga Palota.

**Afioga Hon FIAME NAOMI MATAAFA:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu 5) 2015 i lona faitauga faalua ma ou te fia tautala faamalamalama i ai.*

*Faaluaina e le Sui Palemia, Pisinisi, Alamanuia ma Leipa ma le Minisita mo Tupe Maua.*

**FOFOGA FETALAI:** Tulai mai lau Afioga i le Minisita mo Faiga Palota e saunoa faamalamalama i le Tulafono Tau Faaofi.

**Afioga Hon FIAME NAOMI MATAAFA:** Lau Afioga i le Fofoga Fetalai faafetai lava mo le avanoa. E faatalofa atu foi i lau Afioga ma le paia o le Maota Fono i lenei taeao fou. E piiama foi so matou manatu i le faafetai ua e siitia i lenei taeao lau Afioga i le Fofoga Fetalai aua le alofa ma le agalelei o le tatou Matai Sili i le lagi i le taitaiina mai o lo outou soifua ma so matou ola i le lagi e mama ma le soifua lelei.

Lau Afioga i le Fofoga Fetalai o lenei toe Teuteuga o se toe Teuteuga puupuu lava - ma atonu o lo o faamauiina pea e le paia o le Maota i le tatou Fonotaga talu ai le pasia o le Tulafono le toe Teuteuga (Nu. 4) sa faatulaga ai le tautua i le tolu tausaga. I le felafolafoaiga i luga o lena Teuteuga (Nu. 4), sa atagia ai lava i finagalo faaalua, le moomia o le faamanino atili o le uiga o le upu “tautua i le nuu.” O le auga lena ma le faamoemoe o le tatou toe Teuteuga ua aumai iinei ina ia faamanino atili le uiga o le “tautua i le nuu” aemaise foi le tautua i totonu o tatou Itumalo Tu Taulaga.

Lau Afioga i le Fofoga Fetalai o se faamatalaga puupuu lea i le tatou Teuteuga, ma le faaaloalo lava.

**FOFOGA FEETALAI:** Faamalo atu saunoa faamalamalama i lau Afioga i le Tamaitai Minisita. O le tatou avanoa masani o tatou felafolafoaiga i tulaga lautele i le Tulafono.

Tulai mai se tasi o sui usufono mo Vaimauga Sisifo, Tofa Lefau Harry Schuster.

**Tofa LEFAU HARRY SCHUSTER (Vaimauga Sisifo):** Faafetai lau Afioga i le Fofoga Fetalai mo le avanoa. Faafetai i le alofa ma le agalelei o le Silisiliese ua tatou maua lenei feiloaiga i Lona alofa ma Lona agalelei. E faafeiloai atu ai i lau Afioga le Fofoga Fetalai, lau Afioga i le Palemia ma le Kapeneta, le Taitai o le Itu Agai ma Sui Taitai, Afioga i Minisita Lagolago ma sui usufono foi o lenei itu, le paia ma le mamalu o lo o faatasi mai i totonu o le Maota i lenei taeao.

E faatalofa atu foi i le tapuaiga a Samoa, ae tainane le tapuaiga a si o matou itumalo o Vaimauga Sisifo, ae faapea foi Vaimauga Sasae, e moni lava o le faiga palota e lua Vaimauga ae tasi lava le Vaimauga i le faale-Aganuu.

Lau Afioga i le Fofoga Fetalai o le Tulafono Tau Faaofi lenei i lona faataatiaga mai ai, e lagona ai e lou sui usufono vaivai le faanoanoa, e faanoanoa i tulaga faale-Tulafono. Lau Afioga o le Vaega 15 o le tatou Faavae o lo o taua faapea, “Saolotoga mai tulafono faailoga tagata.” E tutusa tagata uma i luma o le tulafono ma e tofu tatau ona maua le puipuiga tutusa i lalo o le tulafono. Lau Afioga i le Fofoga Fetalai, o le Teuteuga o lo o tatou talanoa ai i lenei taeao, e agai se vaega se tasi o fatu ma tulimanu mo Faigamalo Saoloto, i le Tulafono lea o le Saolotoga i le Palota, o lou palota po o ai le taitai e te finagalo malie e tataia lou Malo e taitai ma lou itumalo, ma o le saolotoga foi lea i so o se matai lava i totonu o Samoa, po o fea lava o Samoa e te sau ai, e i ai lau aiatatau e te alu ai i le palota pe a e fia alu i le palota. I lau vaai i le Tulafono Tau Faaofi lea lau Afioga, o le taatiaga mai o le Faavae e so o se Tulafono lava e pasia lona aano, e tatau ona tutusa lona puipuiga po o se alamanuia, po o le faatinoina o le saolotoga o le tagata, po o se faasalaga foi, ina ia aua ne i i ai se eseese o tagata. I totonu foi o le tulaga o le suesueina o le mea moni e ala i le Tulafono, e i ai le talitonuga a faapea o tatou o Malo Saoloto, e tauaso ia le Tulafono e ala i le suesuega o le mea moni i le suesueina o le mea moni e ala lea i le Tulafono. E ala ona faapea e tauaso, ina ia aua ne i iloa atu e le Tulafono le tulaga faapea e mauoa le tagata lea ou te amanaia, ae ou te le amanaia le tagata mativa. E taualoa le tagata lea, ou te vaai i le tagata lea ae ou te le vaai i le tagata faatauavaa. O le mafuaaga lea o le talitonuga lea faapea, ia tauaso, ia aua ne i iloa atu e le tulafono le eseese o tagata ia tutusa tagata uma. I lou faanoanoaga lau Afioga i le Fofoga Fetalai i le Tulafono lea e tulai mai, e i ai lona autu lea e tulituli a o le faatinoina la, e matua anoanoai, (.....) e tele mea e ivi le mata, ae tagi la le mata lea e ivi, a o lea e iloa e le mata pupula le mea sese lea ua tulai mai. O le mea sese lea ou te tautala i ai lau Afioga i le Fofoga Fetalai, ua faeseese le Tulafono Tau Faaofi lea e aumai nei le matai e alu i le itumalo faale-Aganuu ma matai la lea o sui o le taulaga. (.....) ua faigofie le tuutuuga o le Tulafono Tau Faaofi i le agavaa e fai ai le tautua a le matai lea e i totonu o le sui o le taulaga, ae ua matua pulatoa lava i le mamafa ma ona iloa le mamafa o le avega lea ua ave i le matai lea e alu i le faale-Aganuu. A outou tagai i le Tulafono Tau Faaofi i le aotelega, fai mai le faaupuga le faamaninoga o le tautua lea pe a e fia alu i le palota, le tautua lea e tolu tausaga o e matai ma lau tautua i le tolu tausaga i le mea lea e te alu ai i le palota. Afai e te alu i le itumalo faale-Aganuu, monotaga, tagai foi o lona e sau le upu “monotaga”. Ia au la e le o au o se

faamasino e faapito le malamalama i tu ma aga faasamoa, e i ai ia alii ma tamaitai o la e faamasino i tai i Faamasinoga i tai e popoto mamao ia te au i le faaupuga o le mea lea o le monotaga. A o sina ou lava manatu vaivai faale Samoa i le ola mai i Samoa, o le monotaga o le mea lea e patino lava i le matai, e le o le aiga, e le o tagata lautele ma taulelea, o matai o le aiga, o lau tupe po o lau saoga lea i totonu o lo outou nuu i le tolu tausaga. Ae na o le matai lava o le itumalo lea e faaoga ai le upu lea “monotaga.” Ae a sau loa i sui tauva o le taulaga, e faamalie atu i sui tauva o le taulaga ma nisi feoi, ou te le o faapea ou te le fiafia i le Nofoa lea, a ia tutusa le faiga o tatou e leai se upu monotaga o sau ai, o la e sau ai tautua faalauaitele, ae aofia ai le mea a faapea na o le peleti o le faifeau lena e i ai le upu palagi o le “community service.” O le community service lena e sau ai e aofia ai religious activities, events, functions, a ou faasamoaina upu na i le religious activities, o lau upu tau latalata i ai, fai lau peleti i le faifeau i le alu atu i Apia e tau i Laulii, po o ai lava se faifeau i ina e fai lau peleti, ua e agavaa e te alu ai le faiga palota i totonu o le taulaga, e leai se monotaga o sau ai i ina. Sau ai foi functions events, a ou tago e faaupu faafaigofie, a ave lau tupe i le au lakapi ma le au soka, o lena e tautua, lona uiga o lena e mafai ona e alu i le palota. A sau loa ia tatou lea e i i i le itumalo, ona patino mai ai loa lea o le upu “monotaga,” lona uiga e monotaga e tolu tausaga.

O lou faanoanoaga lau Afioga i le Fofoga Fetalai, o lau lava vaai a au ia i ai i mea nei o le aiatatau, o le tatala faalauaitele, so o se isi lava e mafai ona alu i le palota, e sao e tataua ona i ai ni agavaa e ausia. Ia au la e talafeagai le agavaa lea o le matai, e tataua lava ona e matai e te alu i le palota, pe o le itumalo, pe o le Nofoa i le taulaga, po o a nisi mea e filifili e le tatou Palemene, a ia matai Samoa, o le fatu lena o le mea o lea tatou te finau ai e ese mai ai lava Samoa mai isi atunuu. I lau foi vaai e talafeagai le tulaga faapea e tolu tausaga e te nofo ai i Samoa, e talafeagai i lau vaai e le o se mea e talafeagai lea mea faapea o se tagata, i lau vaai i ai faale-tagata, e talafeagai e tolu tausaga aua e tataua ona e iloa ma e faalogoina le lelei ma le tiga o le itumalo ma le nuu lea e te sau ai e te alu e fai ai oe ma sui. E te le iloa le mea lena pe a faapea e te nofo nofo lava i fafo ae faatoa e sau lava e alu i le palota, e moni o lena e te iloa faale-mafaufau, ae e te le o lagona ia faalogona ma tigaina ma le fiafia o tagata o le itumalo, o le tolu tausaga e talafeagai. Ae a tuu atu loa i le mea lea o lea ua sau nei le monotaga lea ua fai mai tolu tausaga e te matai ai toe fai ai, e fesiligia i lou mafaufau, po o se agavaa, po o se pa puipui lea ua tuu mai luma i i, alu atu loa lea sui tauva o le a oo atu le pa lea, ae tapuni mai loa ma le pa, ua le mafai ona alu ai ua le o se agavaa a o le pa puipui.

O lou faanoanoaga lena lau Afioga i le Fofoga Fetalai ua le tutusa le faiga o tatou matai, ua eseese tatou matai. Amo e le matai o le itumalo le mamafa o le avega, ae ua matua mama lava le mea lea e tuu i matai ia ma sui ia e fia o i le taulaga. I lou vaai lau Afioga i le Fofoga Fetalai, a taatia le upu tautua lea e i ai nei, e moni lava e fesiligia, ae a faafinauina le upu tautua i le nuu i le taimi lena, e lautele lona finauina, e mafai lava ona....po o le sui tauva lea i le taulaga po o le itumalo e mafai lava ona finau, afai o lea ou te le oo i lou itumalo i le tolu tausaga lea na tea nei, a fai faalavelave a le itumalo, saogatupe ma mea tetele la e fai, o la e ave lou sao i o i lou aiga, o lea ou te oo i lou itumalo, o la e faalauaitele le uiga o le upu tautua, i lou na malamalama faatauva. Ae a monotaga loa, ua ese lava la le mea ua aumai,

ua maoti lava la le mea lena o lou matai ma lau lava saoga e ave i totonu o le mea lena. O lea la, a faapea la o luga i i lea ua i ai le monotaga a le matai o le itumalo, ae lalo i i le au lakapi le saoga i le au lakapi ma le peleti i le faifeau e sao ai le matai lea e alu i le tauvaga i le taulaga. O le a la le mea tatou te le omai ai i le monotaga lea ae tatou o uma i lalo i i? Tatou o i lalo lava o le tautua lea o le peleti e ave i le faifeau, o lau tupe e ave le au lakapi, o lau tupe e ave i le au soka, ia tatou qualify uma lava. A o lea la e faaeseese la lea, o lea la e ivi le mata i i le isi itu, ae matua pulatoa lava le mata lea e i i le isi itu, e tele la le mea o lea e ivi le mata lea, a o la e tagi le mata la e ivi aua o la e iloa e le tutusa, o lea ua mama i i ae mamafa luga i i. Ma le isi la tulaga lau Afioga i le Fofoga Fetalai ou te fia faamamafa, o le faatinoina o so o se Tulafono.....

**Tofa Lealaillepule Rimoni Aiafi (Faleata Sisifo):** Lau Afioga i le Fofoga Fetalai, faamolemole lau Afioga ua faalua ona saunoa le sui usufono lea, e ivi le mata toe tagi ma le mata la e ivi, sa ou faapea e le mafai ona tagi se mata ivi, na o le mata o la e tilotilo. Sa ou faapea a ivi le mata lea tagi ma le mata la e pupula, o lona uiga ua matua leai lava se mea e iloa. Ia ae se i faamalamalama mai pea e le sui usufono.

**FOFOGA FETALAI:** O lea lava ou te manatunatu atu ona o faaupuga o lea faaoga e le sui usufono.

**Afioga Hon Faumuina Tiatia Faaolatane Liuga (Palauli le Falefa):** Lau Afioga i le Fofoga Fetalai.

**FOFOGA FETALAI:** Ia se i tulai mai le sui usufono mo Palauli le Falefa.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai. O le faalavelave lea o sui usufono e le malamalama i natura o le tino. A ivi le mata pau le mea e omai ai o somo. O lona uiga la e sao ia le sui usufono mo Vaimauga Sisifo, Tofa Lefau Harry Schuster.

Ma lou faaaloalo lava.

**FOFOGA FETALAI:** Ia ou te manatu o lea lava sa ou matau atu i le saunoaga a le sui usufono ia ae talitonu foi ia e ava tele i le faafofoga mai a le tatou atunuu.

Ou te fautuaina le sui usufono aua le toe tauina le upu lea mataivi. Ou te taofi ae popoe i le tulaga o tatou felafolafoaiga. Sa faatonuina ai foi le sui mo Faleata Sisifo i le tatou Fono ina ua atagia o Tulafono mataivi ae ou te manatu e leai se Tulafono faapea i totonu o le tatou Maota. Malie le sui usufono faaoga se isi upu e talafeagai ona ou te taofi mo le faamamaluina o le tatou Fono. Ia tatou matau, leaga e leai ni Tulafono faapena e aumaia i le Maota. E leai ni Tulafono e aumai e tagi le isi mata ae ivi le isi mata. Ae tatalo atu ona o lea ua faaopoopo mai ma isi upu ua le talafeagai ai lava le tatou talatalaga i lenei taeao.

Ae finagalo malie le sui usufono faaoga se isi upu la e tele upu a le tatou atunuu ne i te i ua.....



**Afioga Maualaivao Pat Ah Him (Palota Taitoatasi):** Lau Afioga i le Fofoga o le Fono.....

**Afioga Hon Palusalue Faapo II (Taitai o le Itu Agai):** Lau Afioga i le Fofoga Fetalai.....

**FOFOGA FETALAI:** Ia lau Afioga i le Taitai o le Itu Agai.

**Afioga Hon Palusalue Faapo II:** Sa ou manatu a o la e saolele lava le saunoaga a le sui usufono. O lona lea malamalama agai i le Tulafono e le o faaleagaina ai le Tulafono e tau o le mataivi. Ae ua ou faanoanoa lava i lenei taeao ona o le lauga matagofie a le sui usufono. O lou la talitonuga o ona manatu ia e aumai ai. O la e sao lelei lava le saunoaga a le sui usufono.

**FOFOGA FETALAI:** Ia o lea ua ou maua lou finagalo. O le sao lena i lou finagalo, oe lava lena ia.

Tulai mai se tasi o sui usufono mo le Palota Taitoatasi, Afioga Maualaivao Pat Ah Him, ona tuuina atu ai lea o le avanoa i le Minisita.

**Afioga Maualaivao Pat Ah Him:** Faafetai i lau Afioga i le Fofoga Fetalai. Ou te talitonu ou te fia fesoasoani foi i le mataupu lea. O le taua ia ma manaia i le faalogologo atu i le lauga a le sui usufono mamalu. Na o lou faalatalata atu lava, e sao e logogata i lau faalogo le upu lea e tau soo, ae na ona ou fia fesoasoani atu, e a pe a faaoga le upu lea. E pogisa le isi mata ae malamalama le isi mata. E pei o le agaga lena ma le faaaloalo ina ia matagofie le tatou taeao, faafetai.

**FOFOGA FETALAI:** Ia tulai mai lau Afioga i le Minisita mo Fesootaiga ma Faamatalaga Tekonolosi.

**Afioga Hon Tuisugaletaua Sofara Aveau (Minisita mo Fesootaiga ma Faamatalaga Tekonolosi):** Faafetai i lau Afioga mo le avanoa. Leai ua ou tulai atu o lea lava e tau matauina pei ua tau le talitonuina saunoaga a le sui usufono mamalu. O lou manatu ona o saunoaga ia e fai e le tagata e ivi le mata, ae leai se isi o latou e ivi se mata. O lona uiga la e le tatau la ona faatusa i se mea latou te le iloa.

**FOFOGA FETALAI:** Tulai mai lau Afioga i le Sui Taitai o le Itu Agai.

**Afioga Hon Aeau Peniamina Leavaiseeta (Falealupo):** Lau Afioga i le Fofoga Fetalai a amanaia, o lou lea talitonuga, a amanaia e le Maota lea le saolotoga o faatusatusaga, e mafai ona fai se tala ona faatusa lea. Ae faanoanoa pe a faapea e aua le faia se faatusaga e illustrate ai le manatu. Ae o le taua ia o le manatu. Na ona mafaufau lava i ai, e te le mafaufau i le tagata mataivi ae faafofoga i le taua o le aoaoga lea aumai pe sao.

**FOFOGA FETALAI:** Ia se i silasila la i le mea lea na saunoa mai ai le sui usufono mo Palota Taitoatasi, oka se matagofie. E pogisa le isi mata ae malamalama le isi mata. O le apoapoiga lena a le Fofoga Fetalai. Ia tulai mai le sui usufono mamalu mo Vaimauga Sisifo e faaauau le saunoaga.

**Tofa LEFAU HARRY SCHUSTER:** Lau Afioga i le Fofoga Fetalai e tumu au i le faaaloalo i lau Afioga. O lea ou te mafaufau a po o le a le matuia o lau faamatalaga, aua fai mai o le Tulafono ma le Faamasinoga e tauaso. O le mea lea ou te fai atu ai ou te le o fai atu o se tagata. O le mea lea ou te fai atu ai i le Tulafono o le eseese e pei ona ou taua. Ia lea la ua tapuni le isi mata ae tete le isi mata, aua o le mata la lea e tapuni lea e tilotilo i tupe a le au lakapi ma le au voli ma le peleti o le faifeau. A o le isi mata lea e tilotilo atu i le matai lea e alu i le faale-Aganuu e alu i le monotaga. O le eseese la lena lea ou te fai atu ai, aveese la isi upu ia. Tapuni le isi mata ae pupula le isi mata, ae o la e iloa lava le eseese o mea ia e lua. E tele le eseese o le peleti o le faifeau ma le monotaga, e mamafa atu le monotaga.

Lau Afioga i le Fofoga Fetalai, so o se Tulafono e tataua ona ave e le Tulafono le avanoa i so o se isi la e fia faatinoina se aiatatau pe maua le faamanuiaga o le Tulafono ia mafai ona faatinoina ai lea tulaga i lalo o le Tulafono. E le tataua ona faaese e le Tulafono le tulaga lea.

A tatou vaai la i le mea lea ua tatou faia i le suiga o le Tulafono o Faiga Palota, o lea pe toe 6 masina oo atu i le Faiga Palota a o lea e sui atu lava le Tulafono. Ae le o suia la faapea ua tutusa uma ai tagata uma. Ae ua sui e maua ai e na o nisi vaega le faamanuiaga ma le puipuiga o le Tulafono a o isi la ua le mafai.

O le uiga o lau faamatalaga lau Afioga, i suiga ia o lea i ai tagata sa fuafua e o i le Faiga Palota ae o le a le mafai nei ona o le Palota ona e le mafai i totonu o le ono masina ona e faatinoina se manaoga e tolu tausaga lona faatinoina. O lau tilotilo la i ai, e lua fesili. O le a le mea na le faia mai ai i le taimi ua tea ia maua le tolu tausaga? O le tolu tausaga i le nofo ai Samoa ua leva ona outou silafia ma iloa le tulaga lea. O le auvaega foi sa nonofo i fafo sa latou silafia le tulaga lea. Ou te iloa foi e i ai isi na malaga mai fafo ma omai i totonu o le Paeaiga lenei ma nonofo i totonu o Samoa i le tolu tausaga ina ia mafai ona faatino le tulaga lea o le tolu tausaga. A o lea la ua faapoopo atu ma le tolu tausaga o le matai toe alu atu ai la ma le mea lea ou te taumafai atu ai o le tautua, e i ai la isi o le a le ausia. O le faigofie ia i lau vaai lau Afioga i le Fofoga Fetalai. A faataatiaese le Tulafono lea Tau Faaofi mai, taatia i le mea o lo o i ai. Tautua o e finau i tai i le Faamasinoga po o le a tonu a le uiga o le upu lea tautua. E le faapea a aumai le Tulafono ia tatou... E tatou te faia le Tulafono, na o tatou i lalo o le Faiga Faavae a le Malo o Samoa, e mafai ona faia Tulafono e le mafai ona faia e le Faamasinoga. Ae oo loa i finauga po o le a le uiga o le upu "tautua" ia o la e avanoa. e tele tupe a le tatou Malo la e alu i Faamasinoga Land and Titles.....

**Afioga Tafua Maluelue Tafua (Aleipata Itupa i Lalo):** Lau Afioga i le Fofoga Fetalai o le mea fia faamalalama.

**FOFOGA FETALAI:** Malie lava le sui usufono mamalu, se i tuu atu le avanoa o se mea e fia faamalalama.

Tulai mai le sui usufono mo Aleipata Itupa i Lalo.

**Afioga Tafua Maluelue Tafua:** O le ala o lou tulai atu ma le faaaloalo, e le faalavelaveina le saunoaga. Manaia tele lou finagalo. Ae o lau fesili ma le faaaloalo i lau Afioga i le Fofoga Fetalai, faamata a sui, o le a se finagalo o

lau Afioga pe a sui le mea lea e i ai nei ia tutusa le matai o lea e fia alu i le Nofoa Tu Taulaga ma le matai o lea e alu i le aganuu, o le a sou finagalo?

Ma le faaaloalo.

**FOFOGA FETALAI:** Tulai mai se tasi o sui usufono mo Vaimauga Sisifo, Tofa Lefau Harry Schuster e faaauau le saunoaga.

**Tofa LEFAU HARRY SCHUSTER:** O lau lava vaai i ai lau Afioga, a taatia i le upu “tautua” ae finau le upu tautua. Po o fea la e faatino ai le tautua lena? Po o le itumalo lea e te sau ai po o totonu o Nofoa Tu Taulaga lea e te alu ai. A o le tautua la po o fea lea e fai ai le tautua lea. Ae a faamaoti loa la le upu monotaga ua faapito loa la le Tulafono. Ua mamafa le avega e ave e matai la e o i nofoaga faale-Itumalo aganuu Samoa, ae mama le avega mo le matai e alu i le Nofoa Tu Taulaga.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegao:** Lau Afioga i le Fofoga Fetalai.....

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** A tatou alu i le mea lea e saunoa mai ai le sui usufono ua matua tele le sese ma le faaletonu. O lona uiga e sao ai le matai na ona matai ae alu tautua i le isi itumalo. E le aumaia la le tautua lena e oso ai i le itumalo lea. Se i vaai i le tele o le sese. Afai o le Lepa e fia oso i Lepa a la e nofonono i Satupaitea ma fai ai lana tautua, ae faaoga le mea lea na saunoa mai ai le sui usufono. E faapefea la ona sau oso i le Palota i tua i Lepa ae la e fai le tautua i Satupaitea? Se i vaai i le vaivai o lea ituaiga saunoaga.

Lau Afioga i le Fofoga Fetalai e i ai le upu faasamoa, “o le uta a le potō e fetāla’i ae o le uta a le vale o le taofiofi mamau.” O le mea lena lea e taumafai le Tulafono e aumai i luma. Ua leva ona lugā, lalō le Maota lenei i le taimi na aumai ai le Tulafono Tau Faaofi lenei. O upu a ia sa aumai, e le o manino le faamatalaina ma le faauigaina o le upu “tautua.” O le upu tautua e tataua ona faasinotonu lava i le monotaga ma o le monotaga o le monotaga a le matai. Afai sa fai lau tautua faataulealea e le mafai ona tosotoso mai le tautua lena e te pasese ai i luga o le matai. O le tofi lea tatou te talanoa i ai o le tofi o le itumalo e alu i luga o matai. E le aumaia la le tulaga faataulealea e fai ai le tofi o le matai.

Lau Afioga i le Fofoga Fetalai, e tataua ona ou faamalo i le Tamaitai Minisita mo Faamasinoga ma Pulega tau Faamasinoga. Lea faatoa uma atu le Fono ma le anoano o lauga na aumai, e faamatala manino ia le uiga o le upu tautua. E sili atu ona manino pe a tuu i ai ia le upu lea o le monotaga. O lea la ua fai a o lea foi ua faaseā. O la le e faafogafoga mai le atunuu i o tatou manatu e fai i totonu o le Maota lenei. Afai tatou te o i le tulaga o le tutusa tagata uma pei ona aumai ai le Faavae, ua uma ona teuteu le Faavae. Ua uma ona tagofia le mataupu lena ina ia mafai ai ona faatino e le Tulafono o Faiga Palota le tulaga lea o le uta fetāla’i ina ia talafeagai le suiga ma le tulaga e tataua ai. E le soona faia i se tulaga lē talafeagai. O lea ua uma ona teuteu le Faavae. Ae na mafua ona teuteu le Faavae ona e i ai ia Nofoa ia Tu Taulaga. E tele lava le lavelave lea e i ai i Nofoa ia Tu Taulaga.

O se mataupu ea na tatou faia i le taimi nei? Leai, o le mataupu lava na tuu i ai e o tatou matua ma tatou tuua. O latou na faia le Faavae lea sa tuu i ai ia le lē tutusa lea e fai nei. O lea lava la na sau ai le lē tutusa lea faatoa tau teuteu atu. O fea se aganuu, o le aganuu e pulea e matai ae fai le uluai Palemene ma faagasolo mai Pulega ae saofafai ai ma taulelea e toalua? O le matua le fetui o lena tulaga na i ai. Ae sa faatino i luga o le Faavae, i luga o le faautautaga tataui, i luga o le uta fetāla'i po o le tofa fetāla'i. O le uta a le potō lena. Lea la na sau ai, sau ai, sau ai. E tele lava tagata sa matai o le atunuu sa le fiafia i le mea lea. E faapefea ona fai lenei Fono a le Palemene o le Fonousu a Samoa ae saofafai ai ma taulelea i totonu? E le faapena ona faia ni fonō a nuu. A o lea lava sa faaalū leaga o le Faavae ma le mea na fai mai ai o tatou matua. Ona sau, sau ai lea, faifaimalie lea ua matai uma. O lea ua Samoa moni le tatou Palemene. Ia ona toe liliu loa lea i nai mea laiti ia masalo o Teuteuga mo le taimi nei, e le uma ai Teuteuga. Pe toe sau foi se isi Teuteuga ua ese foi. Ae mo le taimi nei o lea ua faataatia mai le auala e fai ai le tulaga o le ituaiga monotaga lea. A fai nei le mea lea e fai mai ai, o lona uiga e oo lava i sui usufono ia e toalua ua le agavaa le sui pe afai le mea lea e agai mai ai le sui usufono o lo o saunoa nei. E le talafeagai.

E faapena lau Afioga i le Fofoga Fetalai tatou te taumafai, taumafai, taumafai e fetuutuunai le faautaga ma le faatofalaiga fetāla'i ina ia mafai ai ona saofaga le anoano o finagalo eseese o lo o aumai nei i totonu, ina ia mafai ai ona faatino i le tulaga o le agaga lea o le uta fetāla'i e mafai ai ona alu ia le tulaga o le faaeeseese o mea, ina ia faatino ai le agaga lea sa amata ai le tautalaga. O le uta a le potō e fetāla'i.

**Afioga Hon Palusalua Faapo II:** Lau Afioga i le Fofoga Fetalai, na o sina mea lava i le saunoaga a le Afioga i le Palemia.

**FOFOGA FETALAI:** Ia o lenei lava e taumafai atu le Taitai o le Itu Agai e tausisia le tatou taimi ma le alu o le taimi o le sui usufono o lo o saunoa. Agai pea saunoaga i le saunoaga a le sui usufono e le mafai ona toe fai se isi faauilavea po o se isi faasaoga.

**Afioga Hon Palusalua Faapo II:** E pau lava le mea o le matua sese o le faatusa lea sa saunoa i ai le Afioga i le Palemia. A e nofo i Satupaitea ae e sau e alu i le Palota i Lepa. O lea e manino lava le saunoaga a le sui usufono. O le itumalo la e te tautua i ai ma fai ai lau monotaga o le itumalo lena e te alu ai i le Palota, e pei o le mea lena lea taumafai atu ai.

**FOFOGA FETALAI:** O lea ua maua lou finagalo. E pei o lea e agai le faamalamalamaga a le Afioga i le Palemia i le sui usufono o lo o saunoa. Tulai mai....

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga i le Fofoga Fetalai, i le mea lea na ou tulai atu ai, a lea na manino. O le tulaga lea e oo i ai sui usufono lea e Tu Taulaga, a faapea e fai le mea o manao i ai le sui usufono le la, a tatou alu i le faauigaina lea, o fea lava le mea e fai ai lau tautua e mafai ona e sao ai ina ia faalaugatasia sui uma i le tautua matai i le nuu o lo o matai ai, e le fetui. O lona uiga ua leai ni sui Tu Taulaga aua e tatau ona o i mea la e matai ai. E leai ni matai i i. Ua e

malamalama? E leai ni matai e faia i luga o ni nofoaga o fanua umia saoloto. E leai ni matai e fai ai.

O le tulaga lena lea ou te fai atu ai, e i ai mea e tatau ai ona faaeseese ma leai ai se tulaga e tau faatutusa ma faalaugatasia. Afai foi e avatu le faiga faapitoa mo Nofoa Tu Taulaga e fai ai Nofoa faale-Aganuu e le fetai foi. A o le faiga lea e taumafai, e taumafai e tau faamalie i tu eseese i le taimi nei, mo le taimi nei.

**FOFOGA FETALAI:** Ia, tulai maia le sui usufono mo Vaimauga Sisifo, Tofa Lefau Harry Schuster e faai mai le saunoaga.

**Tofa LEFAU HARRY SCHUSTER:** Lau Afioga, e matua ese lava le mea la e saunoa i ai le Palemia ma le mea na fai atu ai lau faamatalaga, a o lea e faasino foi i isi mea i tulaga o sui usufono nei e toalua. O tatou uma lava ia e o i le faiga palota mo itumalo, e matua manino lava le Tulafono Tau Faaofi mai le amataga, na o le nuu ma le itumalo o lena e te matai ai e mafai ona e sau ai. O tatou uma lena. A o Nofoa ia e lua Tu Taulaga, na o le ono masina e te nofo ai i Nuu Tu Taulaga i Faleata po o totonu o le Vaimauga, ae e te matai i se isi mea, o la e fai mai ai lau tautua i se isi mea, ona mafai lea ona e alu i totonu o faiga palota. O le eseese lena o lea ou te fai atu ai. Ou te le o fai atu i se mea foi lea faapea e faaeseese Nuu Tu Taulaga lau Afioga i le Fofoga Fetalai.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga o le mea e fia faasao. O lea ou te fai atu i le mea la e saunoa mai ai le sui usufono lea, ia tasi, ia faalaugatasia e le mafai.

**FOFOGA FETALAI:** Malie le sui usufono, se i tuu atu le avanoa i le Afioga i le Palemia.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Alaala i lalo le sui usufono lea. O le mea lea e fia faasao atu, o le manatu lea e tatau ona faalaugatasia. E faapefea la ona faalaugatasia? A faapea la e faalaugatasia i le tulaga lea e i ai sui Tu Taulaga ina ia sao ai sui usufono ia, o lona uiga ua sao le mea sesē lena. Po o fea lava le mea e fai ai lau tautua, e mafai lava ona e sau e oso i le isi nuu e lē sao ai o se sui faatu talu ai ua lautele tele le faauigaina o le tautua.

A o le mea lena lea e ala ai ona ou fai atu, e i ai lava mea e tatau ona tuu i ai le feeseeseaiga, le uta fetāla'i, ona e i ai tulaga faapitoa o Nofoa ia na faavae mai lava i le taimi na Tutoatasi ai Samoa. O lea la tatou te taumafai e puipui le faaauau pea o Nofoa nei, ua sui igoa, atonu e oo atu i isi Paeaiiga i luma, ua toe i ai foi nisi Tetueuga. Aua o lea lava e i ai faigata ia e le mafai ona aveesea, e tupu pea tupu pea tupu pea fesili ma manatu i le lumanai, a o le tulaga lea o lea ua i ai le faatofalaiga a le Malo i le taimi lena.

**FOFOGA FETALAI:** Ia, faai maia lau saunoaga le sui usufono mo Vaimauga Sisifo, Tofa Lefau ua maea lou taimi.

**Tofa LEFAU HARRY SCHUSTER:** E mafai ona faaopoopo se isi 20 minute lau Afioga?

**FOFOGA FETALAI:** Ia, malie ia e le uma, o lea tatou te agai i le tatou iloiloga auiliili, ae aumaia lou finagalo e faaiu mai o lea ua tali manino le Malo, ua lagona lau faatofalaiga, e manatu o lea ua lagona le Maota ma o lea foi ua faamaumau, a o le tali lea ua avatu e le Malo. Faaiu maia le saunoaga.

**Tofa LEFAU HARRY SCHUSTER:** Faafetai i lau Afioga i le Fofoga Fetalai. E leai, e le ese lou manatu mo le tulaga foi lea ia o i le palota, a ia tutusa la aiaiga. O lau faamatalaga, a faapea o tatou ia e o i itumalo, a sau lava ma alaala i ai, o le uiga o le tautua o le ave o le peleti i le faifeau ma tautua i le nuu faalauaitele, pei o le mea lea e ave i sui usufono ia Tu Taulaga, e tatou te tutusa uma, e leai lava se faigata, tatou te o uma i le upu o le tautua. Ae a sau loa, o le uiga o lau tala, a faaaoga loa la le monotaga, ua matua vaiti lava le mea lea e i ai le monotaga mo i tatou nei matai o itumalo, ae le o faia la le mea lena i le taulaga. Ae a tatou alu uma faalauaitele pea le tautua po o le fesoasoani i Ekalesia i totonu o Faleata ma le Taulaga e mafai ai ona o sui usufono ia, aua o la e matai, e le tetee lou manatu i lena mea. Ae a faapea la ua monotaga tatou nei o sui usufono matai o le itumalo, e faigata la, o lona uiga o le a i ai matai o la e fia o i palota i itumalo, o le a le mafai ona o ona o le tulaga lea. E pei o lou manatu lena. A taatia le mea lea e i ai ae alu faalauaitele i le tautua, e mafai uma lava ona tatou palota, e aofia ai foi la ma sui usufono ia Tu Taulaga. Ae a specific loa la i le monotaga, ua faigata loa la le avega mo matai o lea e o i le itumalo.

O le uiga la o lau faamatalaga, a faapea o le tagata sa tapena mai, sau mai Niu Sila, tolu tausaga, ua tolu tausaga foi tausaga o matai, ae toe alu atu loa la ma le monotaga ae le i atoa le tolu tausaga lea, ua le mafai loa la ona alu le tagata lea i faiga palota. O lau la vaai, ua faapito la le Tulafono Tau Faaofi ua le mafai e le tagata lea ona alu. Ae mafai ona faataatai pei o le mea lea e i ai nei, ae ave la le avanoa i lele isi faiga palota, tapena mai la i mea ia. E tolu tausaga e te sau ai e te nofo i totonu o Samoa, tolu tausaga ua e matai i totonu iinei, tolu tausaga e te monotaga ai. O lea la ua lava le taimi i le lumanai e te faatinoina uma ai mea ia ona e sau loa lea e te alu i le faiga palota. E leai se finauga. A avatu le taimi lena ae te le ausia le tolu tausaga o le monotaga, o lou lava lena faatamala ma lou le manao e te tausisi i le Tulafono aua o lea tatou te iloa uma lava o lea e lava le taimi na avatu. Aua o lea tatou te iloa uma lava, e le mafai i totonu o le ono masina ona faatino se mea i le tolu tausaga, a o lea o le a fai le faiga palota.

**FOFOGA FETALAI:** Malie sui usufono e onosai mai o lea ua faamaea mai le saunoaga a le sui usufono.

**Tofa LEFAU HARRY SCHUSTER:** Faafetai atu i lau Afioga i le Fofoga Fetalai, faamalie atu pe afai ua i ai se tala ua paopapa. Ae faafetai tele mo le avanoa. Manuia le tatou Fono.

**FOFOGA FETALAI:** Malo faafetai. Ia, ua faaiu mai le saunoaga a le sui usufono.

Tulai mai lau Afioga i le Minisita mo Tina ma Tamaitai, Atinae o Nu'u, Afioaga ma Agafesootai.

**Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu, Afioga ma Agafesootai):** Faafetai i lau Afioga i le Fofoga Fetalai ma le mamalu o le Maota vaeatu foi le faafofoga tapuai mai a le tatou atunuu. Ou te masalo ua mamafa lava le finagalo o le sui usufono i le Teuteuga pei e foliga o lo o fai e le Malo se mea e le talafeagai ma le tatou Tulafono ma tu ma aga faale-Atunuu. Ia silafia o le Tulafono Tau Faaofi lenei, e o faatasi lava le Tulafono Tau Faaofi ma le aganuu. Ma ia aua foi ne i galo i le sui usufono, e moni o ia o le Loia, ae sili atu le Loia lea e faatuatua i ai le Malo, le Loia Sili .E le soona faia e le Malo se mea. Ia silafia e sui usufono mamalu o le Itu Agai, o le Malo lenei e tapa lava le fautuaga a le Loia Sili i so o se Tulafono Tau Faaofi e fai. O le mea lea, o lafoga e faapea e faauigalua lafoga e uiga i se Tulafono, pei la o le Tulafono Tau Faaofi lenei e tusa ai o le saunoaga a le sui usufono, o le mea lena o lea e manumanu i ai, leaga e mau lava e faalele mau e matau.

**Afioga Hon Palusalua Faapo II:** Lau Afioga i le Fofoga Fetalai, o se mea e fia faasao, leaga o lea ua saunoa faalauaitete mai lau tala i le Itu Agai.

**FOFOGA FETALAI:** Onosai mai le Taitai o le Itu Agai, se i uma ona avatu lea o le avanoa. E maua lava lo outou avanoa e lauama tootoo le tatou Fono.

**Tofa Hon Tolofuaivalelei Falemoe Leiataua:** A o le tulaga lea i le tolu tausaga ua uma ona matou sailia, o lea faatoa sagatonu le Tulafono Tau faaofi i le Teuteuga lenei. Aua e le faapea a e sau e tapena e aveia ma sui tauva i le tolu tausaga i lou nofomau i le nuu, e te le faapea la e te sau e tautua i lou suafa taulealea, e tatau ona i ai sou matai.

Lona lua, e te le nofo fua i totonu o se afioaga ma se itumalo e aunoa ma le faiga o se tautua, o le mea lava ua leva, ae o le faamatalaina o upu ia, o le tautua ma le monotaga, o lea e malamalama lelei le Tulafono Tau Faaofi, o le tagata e le saofai i totonu o saofaiga a nuu, e le malamalama, e le malamalama. A o tagata e feagai ma le nuu, le pulega a alii ma faipule i aso uma aso uma, e lava lona silafia i le mea lena.

O le mea lena o lea ou te fautuatu ai foi, leaga e tafafao taliga o tufuga uli, a o upu ia e aumai, e tauleagaina ai mea lelei o lea e taumafai i ai le tatou Malo. O lea ua malele le Afioga i le Palemia, o mea na outou finagalo i ai, o lea lava ua taumafai e fai ia faamalieina o outou finagalo. A o lea la ua tulai mai ia te au, e faauigalua le lauga, e le malamalama le Loia i mea ia e saunoa i ai i le tautua ma le monotaga i totonu o Itumalo Tu Taulaga ma itumalo faaalaalafaga, i totonu o nuu.

**Afioga Hon Palusalua Faapo II:** Lau Afioga, e te talia ia ituaiga saunoaga faauigalua? O lea e saunoa le sui usufono i lona lagona ae fai mai e faauigalua.

**FOFOGA FETALAI:** Malie lau Afioga i le Minisita. Ou te faamalulu atu i lau Afioga i le Minisita....

**Tofa Hon Tolofuaivalelei Falemoe Leiataua:** O lea ua faasoese le Afioga i le Taitai o le Itu Agai, ae le afaina, ia faamanuia le Atua ia te oe.

**FOFOGA FETALAI:** E faamalulu atu i le saunoaga a lau Afioga i le Minisita mo Tina ma Tamaitai, Atinae o Nuu, Afioga ma Agafesootai, ou te taofi lava o lea ua faaiu mai le saunoaga a le sui usufono mamalu. Ou te talitonu foi e le toe laasia le vasa lea o lea ua manino ma malamalama, ae amanaia foi le tulaga o le folasaga a le sui usufono, o lona lava lea finagalo sa faaalua i le Maota. Ma ou te manatu foi, ua faamuta ai lea mataupu, o lea ua faaiu mai le sunoaga a le sui usufono mamalu, ma ua lagona le saunoaga a le Afioga i le sui usufono mamalu na saunoa.

**Tofa LEFAU HARRY SCHUSTER:** Lau Afioga i le Fofoga Fetalai, faafetai tele lava mo le avanoa. Lau Afioga, e tele lou faaaloalo i le Afioga i le Loia Sili ma le Afioga foi i le Minisita ma le Matagaluega, aua e le o se galuega faigofie. Ae le faapea foi lea e faasao e le isi Loia le isi Loia, e leai, e popoto uma lava Loia, ae eseese foi Loia, o le isi Loia e nofo i le Ofisa a o le isi Loia e alu i le Faamasinoga. O matou la ia e o i le Faamasinoga, faatoa maua lava sina fasi malamalama lena ia oe pe a e oo i luga i le Court foi lea of Appeal. Ae le faapea e faasao e le isi Loia le isi Loia, o Loia lava ia e finau. E leai se Tulafono faapea a matou o Loia a faapea e Loia Sili pe Faamasino Sili pe a, ona avatu lea e le Atua papamaa na o oe lava e te potu, e popoto uma lava Loia.

Lau Afioga i le Fofoga Fetalai, ma o lafoga foi i totonu o le Maota, a i ai se faaupuga ua sese ia te au, e faamalulu atu. A o lou talitonuga, o le Maota lena e le alo tala a le isi sui usufono na filifili mai i le isi sui usufono, tatou te finau pe eseese o tatou manatu. Ae a uma ona tatou finau, o le Tulafono o la e manino le Tulafono a le Palemene, manino le Faamasinoga, e le faia e se Palemene se mea sese, so o se Tulafono e faia e le Palemene, o le mea sao a o la e sa finau ai a o le mea sao. Seiloga lava e i ai se mea e avatu e le Faamasinoga ona tilotilo lea o le Faamasinoga pe i ai ni nai eseese ia i i, ae le i fai mai se Faamasino po o se Palemene e sese se Tulafono.

Lau Afioga, ma le faaaloalo tele lava.

**FOFOGA FETALAI:** Malo. Na pau lava lea o le mea lea ou te tapa ai le tatou Maota i lena taeao ona o lo o i ai pea tatou Tulafono Tumau o lo o limatataiina ai tatou. O lafoga ma saunoaga a sui usufono, tatou te saunoa i luga o tulaga o lo o faatulafonoina. O le Tulafono Tumau 82, “E le tatau i se sui usufono ona fai ni saunoaga faauigalua, taufaifai, po o nisi mea e atagia ai le mataga o se Tulafono.” O le ala lea o lou tau aapa atu i le taeao, faaoga nisi upu o le tatou gagana, e tele ma laulau le gagana. E pei o le mea lena na ou tapa ai foi, e le talafeagai.

A o le tulaga lava ia i le tuu atu o le avanoa, e leai, o lea lava e tuu atu le avanoa e fai le tatou debate. Ia ae tou te oloolo pitovaa foi ma faifaimalu le faiva, leaga e le na o tatou lea e Fono, o lea e faafofoga mai le atunuu. Ia taulamua atu i le tatou Maota le faamamalu o tuleiga ma saunoaga ma upu. Ia o le a le aoga e avatu ai Tulafono ae tau o Tulafono piopio, Tulafono mataivi, Tulafono le fetai, le faamaoni, o fea la le sao? It's out of here. E le talafeagai. E tatau ona tausi le mamalu o tatou tuleiga ma saunoaga. A o finauga ia, fai outou, o lea lava ou te faatonutonu folau atu. A o upu ma tala, o lena lea ou te piiama ai. Tatou faifaimalie ina ne i avea se naunau o se isi ma mea e pogisa ai se isi, ae ia outou alofagia, fai la outou fetalaiga ma saunoaga ae vaai o la e foi e matau mai le atunuu. Se e iloagofie lava le i'a e



tataa i le papau ma le i'a e nofo i le sami loloto. Faifaimalie. Toleafoa, tulai mai le sui usufono mamalu mo Aana Alofi Nu.1, Afioga Hon Leaupepe Toleafoa Apulu Faafisi.

**Afioga Hon LEAUPEPE TOLEAFOA APULU FAAFISI (Aana Alofi Nu.1):** Faamalo faafetai mo le avanoa i lau Afioga i le Fofoga Fetalai. O taliga lava e fia faalogologo i lenei taeao i saunoaga ma tuleiga a sui usufono mamalu aemaise foi o saunoaga a le Malo ma le faapupulaga, e le gata i le Tamaitai Minisita e ana le Tulafono Tau Faaofi, a o le saunoaga manino a le Afioga i le Palemia.

O nei i le taeao lau Afioga e i le Fofoga Fetalai sa ou usu mai ma le faamoemoe ou te matua teena lenei Teuteuga ona e i ai ona mafuaaga e pei la ona ogatasi ai se lagona ma le finagalo o le sui usufono mo Vaimauga Sisifo pei ona saunoa ai. Ae peitai o lea ua manino le folasaga ma le faamalamalama a le Afioga i le Palemia, ona o lea e pei e faatauata le taeao i sau faamatalaga, ae ou te lagona e le o maua lelei foi e i latou o lo o faapena, e pei e totoe i tulaga o se matou motugaafa. Ae tutusa lelei le latou talitonuga ma lou talitonuga na ou usu mai ma au i le taeao. Ae fai mai le saunoaga a le Palemia, “E fai lau monotoga i Satupaitea ae te fia alu i Lepa.” E fetai? Ia o lea la e tali e le fetai. E faapena la le mea lea e tupu i Nofoa Tu Taulaga. O nei lava ina ua saunoa le Palemia, piki loa e lou mafaufau ma faaaga e le Palemia le upu lea o le uta a le poto e fētāla’i, ioe. Afai na fai e outou tuua ma matua le faataotoga lea ua amata ona tatou teuteua, lea ua amata i le taimi lenei ua tatou taufai matai faatasi sui usufono mamalu o le Palemene. O le a le mea sa fai ai e tuua i aso ua mavae, filofilo ai lava le toalua? Aua sa toatolu, sa sili atu. A lea ua amata ona tatou toe teuteua ia tatou toe foi i le tasi, ia tutusa le tatou Lola, o matai uma. Ae mafua mai e faamalamalama se mea, ae puepue mau atu e tatou ia e fia maua atoa le malamalama, aua e alu le aso o talau le finagalo o le Malo na mafua ai ona fai le tatou Teuteuga.

**Afioga Hon Palusalua Faapo II:** Lau Afioga i le Fofoga Fetalai o se mea e fia faasao.

**Afioga Hon LEAUPEPE TOLEAFOA APULU FAAFISI:** Ia o le a faasao o lea faatoa amata le.....

**Afioga Hon Palusalua Faapo II: I.**

**Afioga Hon LEAUPEPE TOLEAFOA APULU FAAFISI:** O le a le mea o le a faasao?

**Afioga Hon Palusalua Faapo II:** E faamalie atu lau Afioga i se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi.....

**FOFOGA FETALAI:** Ia malie lava lau Afioga, se i avatu pea le avanoa i le Afioga i le Taitai o le Itu Agai.

**Afioga Hon Palusalue Faapo II:** Ioe, o lea matou te malamalama lelei i le Tulafono Tau Faaofi, aua o lea e saunoa faapea o matou e le malamalama. O lea la na matou finau, ona o lea e malamalama le Tulafono Tau Faaofi, ma le aafiaga o sui faatutu o lo o fia o i le Faiga Palota. Pei o le tulaga tonu lava lena.

**FOFOGA FETALAI:** Ia o lea ua maua lou finagalo, ae.....

**Afioga Hon Palusalue Faapo II:** A o lea faatoa malamalama nei i le taeao se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi.

**Tofa Levaopolo Talatonu (Gagaemauga Nu. 2):** Lau Afioga i le Fofoga Fetalai.....

**FOFOGA FETALAI:** O la lava e saunoa le sui usufono mamalu i ona lagona, o le a ave pea le avanoa i le sui usufono mo Aana Alofi Nu. 1, Afioga Hon Leaupepe Toleafoa Apulu Faafisi, a maua foi lou avanoa avatu.

**Tofa Levaopolo Talatonu:** Ioe le Fofoga Fetalai o le mea e fia faasao, atonu.....

**FOFOGA FETALAI:** Ia malie le sui usufono mo Gagaemauga Nu. 2.

**Tofa Levaopolo Talatonu:** Na o sina mea leaga o lea e tau sese mai le saunoaga a le Afioga i le Minisita Lagolago. O lea foi ua toe faalua mai ia le tulaga foi lea o le uta a le potō e fetāla'i, a o le uta a le vale e.....Pe le tataua la ona insert i ai le mea lena i totonu o le Tulafono Tau Faaofi, aua pei e general le mea lena, a o upu lava ia o le Tulafono Tau Faaofi e alu lava i le mea sao e le tau.....E le mafai ona fetuunai tulaga lena i se Tulafono ua aumai ua tumau ma mausali. Pei o le mea lena o lea ua....

**FOFOGA FETALAI:** O lea ua maua le finagalo o le sui usufono, le sui usufono mo Aana Alofi Nu. 1, Afioga Hon Leaupepe Toleafoa Apulu Faafisi, tulai mai e faaauau le saunoaga.

**Afioga Hon LEAUPEPE TOLEAFOA APULU FAAFISI:** Malo faafetai. Pei ua vave ona ou malamalama i le faamalamalama a le Afioga i le Palemia, le upu lava lea sa muai saunoa i ai le Afioga i le Palemia e fai le tautua i Satupaitea, tulou le faafofoga mai a le afioaga aua foi e falefa i ai Tumua ia po o au foi, ou te tautua i Fagalii i lou suafa Pulemagafa, a o ou alu i Fasitoo, e le fetau, e le fetau la i lou mafaufau ina ua maua nei i le taeao, ou te fia alu i i i Nofoa Tu Taulaga. Ae a faasino lau tautua, ona ou alu lea i tua i Fasitoo e aumai ai se pepa e faamaonia ai lau tautua, ae ou te le alu i Fasitoo ou te alu i i i le taulaga. O i ina lea na ou pikia ai nei le sao o le saunoaga. Ae o le mea o lo o esee ai, o monotaga, leaga pei o lea ua ta le monotaga i tua, ae tiutalaloa i i i le tautua. A o lea la e popole le paia o le Palemene, ona ua pei ua faapitoa le upu monotaga, ae a pe a tiutalaloa foi, aveese le monotaga mai i sui usufono nei faaalaalafaga itumalo, ae faatumuai tutusa la le tautua lea.

Ua ou manatu, o tatou e i ai le upu foi lea popole, pei e tau loa i se mea popole loa, leaga o lea e i ai lo tatou faamoemoe i le lumanai, aua a le lelei ona faamanino le monotaga, e au ina te i ua le agavaa le isi e alu ai i le Faiga Palota, a o le monotaga, se o le mea lena e fai e lata au tautua, o le mea lena e fai e lota aiga, e taifei o au o le sao o le aiga, ona fai lea o au matai tautua i le nuu e fai au matai e valu, tulafale, ia o ifo lea e fai le monotaga o le sao o le aiga ma o ifo e o e tautua le nuu, fai le monotaga o le sao o le aiga. Ae le alu au e fai au monotaga o lea e i ai au matai ia, o vae o lou tootoo, ioe. Ia o le monotaga lena o le tautua lena. Ae a fono tauati le nuu, ia logo le sao o le aiga e sau leaga e faigata o lea ua i ai mea ia ua finagalo i ai Tapaau ma Aiga, ona alu atu lea fai, ioe. Ae a tu foi le tootoo e ogaoga se mea e mafua ai, i se taulealea o le aiga po o se isi o vai matai i a ta matai ia na fai, ia e aami le toaina, e sau se i fai mai sona finagalo aua a tea le matai laitiiti lea ma le taulealea, e tea foi le sao o le aiga, aua e le tu se tootoo i se taulealea. O le tatou aganuu lena ma le faasamoa. O le ala lena ua ou manatu ai e taua tele le faamalamalama e le Afioga i le Palemia o le mataupu, e faigofie lava, a o au, se ou te tau atu na ou sau ou te matua tetee i le Teuteuga lenei, ona o mafuaaga na. Pei ona saunoa le sui usufono se tasi o sui usufono mo Vaimauga Sisifo, Tofa Lefau Harry Schuster, ia o le anoanoa isi sui usufono ae tiutalaloa isi sui usufono, ona o le upu monotaga. O lea la ua manino nei, e leai, se aua tatou te fefevale, se o le monotaga lava o le tautua lena, ioe.

Leulumoega leaga o lea sa e faafesili, leaga o oe o le Matua, ioe, a e fetalai lava i se mea e faataoto le tulaga o le aganuu, ia leaga o le mea nei, e uma ona saofai i le fono a le isi nuu, saofai i le fono a le isi nuu, saofai i le fono a le isi nuu, ua leai se ituaiga tautua e le i oo i ai, ioe,...o ou Tapaau ou te tausi i le Vaimauga.....

**FOFOGA FETALAI:** Malie lava, se i avatu le faauilavea a lou sui a tuaoi.

**Tofa Hon Tuuu Anasii Leota (Siumu):** Lau Afioga i le Fofoga Fetalai, e le fia faalavelave i le saunoaga a le sui usufono mamalu, ae o mea ina ia manino atili ai le faafofoga a le Maota ma le mamalu o Samoa.

O lea ua saunoa le sui usufono i le monotaga, matai monotaga loa e fai e le au tautua, o lea la tatou te o ai. O le tautua la, lona uiga o le taulealea. O le a la se finagalo i ai a le sui usufono mamalu i le tulaga lea tatou i ai? Pei o lea lava e faapito le Tulafono Tau Faaofi i Nofoa nei Urban Seat. O lona uiga o le a taulelea pea? Ma le faaaloalo.

**Afioga Hon LEAUPEPE TOLEAFOA APULU FAAFISI:** Ia ua toe ulu lava e le tama lana....ua taunuu ai le upu foi lea, 'ua toe ulu lava e le uo ia le tama,' ae ui i lea, e leai, a foi lea e manino lava le folasaga, ioe, aua a le faia le tulaga lea, o lona uiga, e tatou te le oo foi i ai e matai uma sui usufono mamalu uma o le Palemene, o lea la ua tatou pasia ai, e tataua ona sui, na pasi foi i le Paeaiga, a lea na tulai mai ai sui usufono o Palota Taitoatasi ia matai, o le suiga muamua lena lea na i ai. O lea la ua matai ai nei, o lea la ua toe sui ai i le isi suiga lea ua i ai nei, ia e faigofie lava ona faamalamalama lena mea. E le faapea i le faatusa lea na saunoa i ai le Afioga i le Palemia, e le faapea a e matai e te fia oso i le Vaimauga ae e alu e tautua i Savaii, e leai, e sue po o le a lau fai lea na lafo i i, o le a lau....ioe? E faapena foi la i i. E le faapea ina ia fair foi i nofoaga ia Tu Taulaga, ioe, ia ona sau lea o oe lea e tautua i tua

sau le malamalama sau oso i i le malamalama. O le a la le uiga o le tolu tausaga ma le ono masina? E faigofie ona tatou taumafai ia toso tatou ia malamalama, i lo le taumafai mai e faamalamalama mai, ae nofonofo lava tatou i le paolo o le laau ma aua ai pea le malamalama, se e faapolokiki nei mea. Ae ou te tau le mea na ou sau ai, ou te matua tetee i le Teuteuga lenei, ae talu ai lau faamalamalamaga. Ia faamau ifo le lagolago a Fasiitoo-uta, ma lou faaaloalo faafetai, manuia le Fono.

**Tofa AVEAU TUALA LEPALE NIKO PALAMO (Faleata Sasae):** Lau Afioga i le.....

**FOFOGA FETALAI:** Ia malie lava le sui usufono mo Faleata Sasae, ona o lea sa muamua mai le sui usufono mo Faleata Sisifo. O le avanoa lea ua ou avatua le sui usufono mo Faleata Sisifo? Tulai mai le sui usufono mamalu, o lea ua faamau lou suafa.

**Tofa LEALAILEPULE RIMONI AIAFI:** Faafetai i lau Afioga i le Fofoga Fetalai ona o lea ua...sa i ai se manatu e muamua si ou uso e matua, ia ae o le a faamuamua ia, e aoga foi lea, aua o le mea lea e tupu nei i au lauga, e tusi, tusi, tusi e uma ifo e le faaaoga lava.

Ou te faafetai i lau Afioga mo le avanoa, faafetai foi i le Fonousu a Samoa i lenei taeao matagofie i le faafofoga a Samoa, malo le soifua ma le lagi e mama. O aso uma lava i le olaga o le Samoa, a e ala loa i le taeao faafetai i le Atua, a e moe i le po faafetai. Faafetai i o tatou tuua ua latou faia se faiga filifiliga tonu ma le sao e ala i le Faigamalo ua tatou sapi ai nei. E tele ituaiga Faigamalo, Faigamalo Faakomunisi, Faigamalo Fitafita, Faigamalo Pulea Toatasi, na filifili lava e o tatou tuua le Faigamalo Faatemokarasi, o lea ua tatou saoloto ai ma fiafia. E i ai le saolotoga ia te outou e faaali ai o outou finagalo ma o tatou manatu, so o se Tulafono. Faafetai foi i lau Afioga i le Failautusi ma le Matagaluega i nei galuega tele ua outou faia, e tusa ai o le toe usuia o le tatou Fono i lenei fale, faamalo galulue.

O au nei, e oo loa i le taimi ou te moe ai ou taagulu loa ou te moe fiafia e moe filemu. A o anapo, ua fiu e faamoe ou mata e le moe, o si ou toalua la e fai lava ana galuega foi ia i le po, ae ou moe lava au ia. O anapo la, ou moe ou ala ou tu i luga ou savalivali, sau. Fai mai loa si ou toalua, o le a ea le mea ua e le moe ai, o ai ea lenei e te mafaufau i ai? Ou fai atu i ai, vaai oe, e tele le filifiliga sa i ai lou mafaufau i aso ia, na mau loa ia oe lou loto e le i toe alu ese ma se isi. E le i toe mafaufau foi i na mea. Tago mai e uu lou lima, ia uu lou lima, fai atu, ia o le na, ua e malo i le tausinioga. Ou te le o toe mafaufau la i se isi mea. Fai mai, a o le a ea le mea lenei e te le moe ai ma mafaufau i ai? Fai atu, o, mafaufau i le Tulafono Tau Faaofi lea e talanoa taeao i le Palemene. Ua a la? Fai mai, e te mafaufau o le a o oe e fai soo Fono e te le mafaufau mamafa ia te oe i lenei mea. Fai atu, mafaufau i le Tulafono. E le o tele la i le Tulafono Tau Faaofi lou mafaufau, e tele ia i latou o lo o tusia le Tulafono, e ta te alofa i ai, ailoga o maua se filemu, ailoga o moe lelei, ioe. Fai mai aisea? Fai atu, o, e te iloa le Tulafono Tau Faaofi lea o Faiga Palota lea e fai nei, o le matatia, faatoa tupu lava lea o se mea faapea talu ona faavae le Malo Tutoatasi o Samoa, o se Tulafono Tau Faaofi ua sui, sui, sui, o lea ua aumai ma le isi suiga fai atu e faalima ona sui, e le toe uma. Ou te alofa la i ai. Ia fai mai lea o lou toalua, o, o lona uiga e sui soo o lona uiga la pei o se

vaa foi lele e mama, a puluti atu le isi pu ae mama mai le isi pu, puluti atu le isi mea ae puna mai le sami i le isi mea. Vaai oe, so o se mea lava e fai, e i ai lona mafuaaga, ioe. E i ai le upu faasamoa foi lele, 'o le atu ua se, ua se le atu i ama,' o lona uiga, o le atu ua se i le isi itu o le vaa. A se la le atu, e ala ona se, ua vaivai le tautai, ioe, ua le mamafa i lona mafaufau le mea ua tupu, ioe, ua le mautonu, ioe.....

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga i le Fofoga Fetalai, o au lea ou te le o malamalama po o i ai i lalo o le Tulafono Tau Faaofi le mea lea o le tuu o le au ae maa i aau. O lea e taoto le tatou Tulafono Tau Faaofi, a o lea e fai fagogo le sui usufono lea o lo o saunoa nei. O le mea ua mamafa i lou loto, ona o upu uma lava ia e saunoa i ai le sui usufono, e foliga mai e agai i le tulaga e condemn le Tulafono Tau Faaofi, ae le o aumaia ni mafuaaga. O lea e faaleaga le Tulafono Tau Faaofi ae leai ni mafuaaga. E te le taitai lava ona e form i lea mea o le fai fagogo. Tuu mai po o le a tonu lava le mea lea, e faaletonu. E le taitai talafeagai foi ia au faatusa ia e fai aemaise lava o le sui usufono lea. Sa ou matauina i le Fono talu ai, o le sui usufono lava lea, na o le saunoa, saunoa, saunoa i le mea lea e faamanino le tautua. O lea la ua faamanino o lea foi ua ese le mea lea e tu mai ai. Ae vaai o la e matau mai le au palota. E le lelei le mea lona o le tu i luma, tu i tua, tu i luma tu i tua. O lea ua tatou lalata i le vaivaa, ua tataua ona tuu lou fai fagogo ae aumai loa lau o lou taofi. Ua iloa o le taimi lenei, ne i te i lava ua manatu se isi e maua ni ai i le taimi lenei faaopoopo, e na o ai toese, ai toese, ai toese lava.

**Tofa LEALAILEPULE RIMONI AIAFI:** Lau Afioga i le.....

**FOFOGA FETALAI:** Se i avatu pea le avanoa i le Minisita. Tulai mai lau Afioga i le Minisita mo Tina ma Tamaitai, Atinae o Nuu, Afioga ma Agafesootai.

**Tofa Hon Tolofuaivalelei Falemoe Leiataua:** Faafetai i lau Afioga i le Fofoga Fetalai, ou te masalo o lea ua umi lava ona saunoa le sui usufono i le lē tofa lelei anapo, ae o lea ua ou iloa nei le mea ua...o lea ou te vaai atu, o la sa faitau lana pepa i lana atu lea na se, ae sese lana faamatalaina mai o le alagaupu. O le sisi o le atuiama e le faapea o le sese le atu, o le sese o le Tautai. Ioe lea la e le malamalama i ai le sui usufono. O lona uiga o le mea lona na le moe ai o le tau silasila po o sao le faiga o lana tala lea na faimai. A o faafofoga mai le matou itumalo i Vaitele, ia aua tou te toatamai ia Lealailepule. O le lei malamalama tele o le toeaina i le mea e tau o le atu e sisi e le Tautai ae sisi i le itu i ama. O le atu la lona la ua sese lona sisiina ae le i sese le atu i le tulaga o le vaa la na fealuai a le atu ia ae ua maua e le matau. O le popole tele o le tautai lea na ala ai ona sisi i le itu i ama ae le o le itu i matau. Ia o le mea la lona mo le silafia ona ou te iloa o le mea lona na faigata ai ona moe le sui usufono anapo o le taumafaiga o lana lauga, ma le faaloalo.

**FOFOGA FETALAI:** Malo ae le i toe tuuina atu le avanoa i le sui usufono mo Faleata i Sisifo, ou te manumanu i lou taimi. Silasila foi o lea lava tatou te faataua a tatou saunoaga ona o tatou taimi faatulagaina. E le o ni lauga

tuutalaloa na o le 15, 20 minute a le sui usufono. Ae aumaia lau o lou finagalo, oute taofi foi o lenei lava e faaaloalo atu ona o lenei lava e talaloa a outou saunoaga. Ae aumaia le auga o le faamoemoe o lea ua manino le Malo i lou atugaluga ona o le Tulafono ua tele ona teuteuga. Ae aumaia o lea ua alu lou taimi o lea ua maea le 10 minute ae na o lau fagogo lea e te saunoa mai ai.

**Tofa LEALAILEPULE RIMONI AIAFI:** Lau Afioga faafetai, se o le Tala Faasamoa e amata i le introduction. E amata i se mea e faamatafi ai ma faanofo filemu ai le au faafofoga ia ona oo loa lea i le o'oo'oga. O lea ua toeitiiti a ou oo i ai ae toe faalavelave mai loa le Minisita mo Tina ma Tamaitai, Atinae o Nuu, Afioga ma Agafesootai. Ia o la e maua lelei a e le Afioga i le Minisita le uiga o lau upu, o le atu na sese a o le tautai ua vaivai, faafetai.

Ia o le Tulafono o se Tulafono o lou faauigaina e matua papau a le tofa lea na tusia ai, e vaivai le faautautaga. O le upu e faaoga e le au Kerisiano, leai se faauuga o i ai i le tusiaina o le Tulafono. Ioe. Se i ou oo atu a i le mea lea lau Afioga lea na pisa ai nei, o le tautua. Na saunoa le Afioga i le Palemia ia ma lou faaaloalo lava, e leai ma sa'u tala na oo i le tautua lea talu ai. O au sa ou fai i le Afioga i le Taitai o le Itu Agai ma le matou vaega, o le mea lea ua i ai le suiga lea lona fa (4). It's a none issue, aua tatou te oo fua i ai aua o le tautua lea general o le a lava le tautua e i ai o lenei lava. Ia ou te lei lauga ai lava au i le tautua i le taimi ua mavae atu. O lea la ua aumai nei faapea mai, o le monotaga ma le tautua lea na taumafai atu ai se tasi o uso po o le Afioga i le sui usufono. O le mea lea taumafai atu ai ia tasi le Tulafono mo tagata uma. Ia laugatasia tagata uma i le Tulafono, aua le ese le Tulafono mo Simi ma Sione ese le Tulafono mo Tui ma Seve ae ia tasi le Tulafono.

O le mea lea ua aumai nei e le Tulafono, faapea mai o le monotaga. Kusa o le uiga atoa a o le Tulafono lea la ua vaevae ese mai, e ese le tautua "service" ese le monotaga. A o le mea la e malie ai e leai se faapalagi o le monotaga i le Tulafono lea na aumai, o lea a e sau monotaga. Sa ou manatau la e lelei ona su'e mai se faapalagi o le monotaga, a o lea ua omai define mai le monotaga. Lau Afioga o le definition lea ua faapea mai, compulsory service ae a faasamoa, tautua e faamalosi. Lau Afioga e fa dictionary ia ou te uuina, Mai, Milner, Brat, Aladise. E fa dictionary faapalagi ia sa ou toe tilotilo i ai anapo po o le a tonu lava le faauigaina o le monotaga e i latou nei sa sutesueina le aganuu ma o i tua e taamilo. O tagata foi nei ua leva ona ola i Samoa. Se i aumai se faauigaina po o tusa ma le faauigaina lea aumai i le Tulafono, compulsory po o le faamalosi. Lau Afioga leai ma se faauigaina faapena o sau ai....

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoui:** Lau Afioga i le Fofoga Fetalai.

**FOFOGA FETALAI:** Malie le sui usufono, se i tuu atu le avanoa i le faauilavea a le Malo, lau Afioga i le Palemia.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoui:** Ou te le iloa po o silafia e le sui usufono, o lomi fefiloi na o lomi fefiloi mo tagata e le saofafai i fono a matai ma malamalama i mea la e talanoa ai matai. Ou te masalo foi e leiloa foi le fono e tataua ona fono ai. Ae o

si toeaina lena o Brat ia e le o se Samoa, ou te le iloa po o ai na tagata sa alu talatalanoa i ai. Ae malamalama uma tatou nei e saofafai i totonu o fonu a matai. Ou te le iloa foi i le sui usufono lea saunoa nei po o fai ni a latou fonu.

Lau Afioga i le Fofoga Fetalai ia o le tulaga lena, e alai ona fai ia tusi na, o le lomi fefiloi o le fesoasoani mo e vaivai ae aua le aumaia tusi na i totonu i i. O tusi na tusi e papalagi e tau faasilasila mai i matai o le atunuu e malamalama lelei ia a latou a tu ma latou agaifanua. Lau Afioga i le Fofoga Fetalai o le mea lena na ou tu atu ai, aveese na lomiga fefiloi. Ae se i talanoa atu le sui usufono mo Falealupo aua e seasea foi oo i lona itumalo ma fonu ai i fonu a le latou nuu.

**Tofa LEALAILEPULE RIMONI AIAFI:** Lau Afioga i le Fofoga o le Fonu faafetai, o le mea lea aua e oo foi ia te au ia ma tatou uma iinei e leai a ma se i si e tasi sana faauigaina o le monotoga. E tatou te iloa uma a o le monotaga o lou sao i totonu o le nuu i mea fai po o le tautua. Ae leai se upu o i ai i totonu i i compulsory. E le faapena foi pulega a nuu, o le ese o le aganuu ese le agaifanua. E tofua foi le nuu ia ma le faauigaina o le monotaga.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga i le Fofoga Fetalai, o matai a ia e fai a latou monotaga. O lena e sao le faasamoā aua e leai loa se monotaga ia tasi lena mea e ono oo i ai o le faatea ma le nuu pe a tupu soo le mea lea o le alu atu o talaiga alu atu talaiga ae leai lava se mea e faia, ia faatea loa ma le nuu. O le mea lena e tataua ona i ai aua e le tataua loa ona faapea o se matai faaauau o le nuu ae alu atu saofaga ae leai se mea e faia. E leai la se aoga na matai ai.

**Tofa Levaopolo Talatonu:** Lau Afioga i le Fofoga o le Fonu....

**Afioga Hon Le Mamea Lemalu Su'a Leatuavao Tuiletufuga Ropati Mualia (Minisita mo Faatoaga ma Faigafaiva):** Lau Afioga i le Fofoga Fetalai....

**FOFOGA FETALAI:** Ia se i aveatu muamua le avanoa i le Minisita mo Faatoaga ma Faigafaiva, tulai mai.

**Afioga Hon Le Mamea Lemalu Su'a Leatuavao Tuiletufuga Ropati Mualia:** Faafetai a mo le mataupu lea ua oo i ai, ae finagalo malie foi le sui usufono mamalu ua faalavelave atu i le mataupu lea. Ae leaga o le mataupu e taua ia i tatou o i tatou o tumutumu o aiga ma nuu, mea ia o le monotaga. Silafia foi tele matai ua i ai i le vaitaimi lena, ona o lea i fafo leai se tautua i le nuu ma leai ni monotaga e faia. A oo foi la i se taimi e maua mai ai se faamanuiaga a se nuu po o se meaalofa a se isi a ave i le nuu. Ia ua ave atu ai se tupe pe \$20,000.00 pe \$30,000.00 a tufa le tupe lea a le nuu, faapea lea o toeaia. Ia vaavaai uma a le tatou au fai monotaga e tufa i ai le tupe lea a o i si matai ia e le o tautua i le nuu ma fai ni monotaga ia e le afaina. E faapena mea a le matou nuu e fai. Ioe, o au foi o le alii matua o le nuu. E faapena mea e fai i le nuu ma o lau tala foi lena e fai i le nuu. A aumai se tupe e le tau tufaina aua o le tele o nuu ua tele matai, a o e lava ua fai le monotaga ma le tautua i le nuu o le tagata lena e inu i le faamanuiaga e maua e le nuu. Ia o lau toe soso atu lea ma le faaloalo.

**FOFOGA FETALAI:** Malo lava o lea ua maua atu le finagalo o le sui usufono mamalu.

**Tofa Levaopolo Talatonu:** Lau Afioga i le Fofoga Fetalai.

**FOFOGA FETALAI:** Ia tulai mai le sui usufono mo le itumalo o Gagaemauga Nu.2.

**Tofa Levaopolo Talatonu:** E pei o lea e matau atu e pei o lea e atugalu le finagalo o le sui usufono i le upu lea monotaga. Ia pe i ai foi se lagona foi lele pe sa tatau foi ona sui lea upu. O le faauigaina sao a o le upu lea monotaga, o le mea e momono i le taga. Ae afai la i le tatou mea lea o le a fai ai ia pei e tau faaletonutonu ai foi ma le tatou Tulafono lea, sa ne i momonoina se mea i le taga. Leai lea na ou tau faamalamalamaina atu i le sui usufono o lo o saunoa nei.

**FOFOGA FETALAI:** Ia ua atili ai na le malamalama le sui usufono o saunoa.

**Tofa LEALAILEPULE RIMONI AIAFI:** Sa tatau la ona maua le faapalagi, in the pocket.

**FOFOGA FETALAI:** Toe 5 minute o le sui usufono mamalu.

**Tofa LEALAILEPULE RIMONI AIAFI:** Faatoa amata alii i le kuata e tea ai, ia ae le afaina. Lau Afioga o le mea lea na faamamafa i lau lauga talu ai o suiga nei. O le tatou lipoti lea na ave i o na ave uma ai a le tele o mea nei leaga e fia sefulu vaiaso o tatou galulue ai ma auiliili, auauai. A o le a le tala na aumai? Taatia uma a outou fautuaga na se i omai le isi Paeaiga, ia lea na tatou lolo a i ai. A o a nei suiga ua toe aumai faatopetope faapea? A tatou talanoa loa i le mea lea o le service, service, monotaga....

**FOFOGA FETALAI:** Ia malie ia lau Afioga i le sui usufono manatu o lea ua tu i matagi lou vaa.

**Afioga Hon Fiamē Naomi Mataafa:** Lau Afioga o le mea e fia faasao, o le mea fia faasao lau Afioga.

**FOFOGA FETALAI:** Ia, se i tulai mai le Afioga i le Minisita mo Faamasinoga ma Pulega tau Faamasinoga ma le Komisi o Faiga Palota e ana le Tulafono.

**Afioga Hon Fiamē Naomi Mataafa:** O le saunoaga a le sui usufono i fautuaga ia na aumai, atonu o lea e saunoa agai i le lipoti a le Komiti o Galuega, Tulafono Tumau, Maota Fono ma Mataupu tau Faiga Palota, lea i ai le Pepa a le Palemene Nu. 223. Ou te fia faatepa le sui usufono o lo o saunoa, e le i fai atu se tali faapea e taatia mo le isi taimi. O lena o lo o taatia i tatou pepa o le fonu le Tali aloaia a le Malo, Pepa a le Palemene 243. O le tele o le Tali a le Malo i le Lipoti lea a le Komiti e saunoa mai i ai le sui usufono. O le tulaga o le vaaiga faale-tulafono, e le talafeagai nisi o fautuaga na tuuina atu.



Ia ae o nisi a o fautuaga lea a e mafai ona faaofi ia tatou Teuteuga o lo o faagasolo. Ae na o le pau lena o le mea e fia faasao atu i le saunoaga a le sui usufono.

**FOFOGA FETALAI:** Malo, faaii mai le saunoaga a le sui usufono o lena ua malamalama.

**Tofa LEALAILEPULE RIMONI AIAFI:** Lau Afioga o le tulaga lea ua o'o i ai le tatou talanoaga ma suiga ia ua i ai e matua ogaoga a. O se suiga e moomia ai le soalaupule ma faaali finagalo o tagata. O lea sa avatu ai le manatu a oo i le isi Paeaiga ona fai lea e se Komiti Faapalemene aua o le mea lava e tasi. O le mea lava e loto ai tatou, a la lea ua aumai nei. O fea mea e ave e fai ai finagalo o le atunuu a o fea mea e fai toatasi ma aumai pasia e tatou? A o le mea e le o se mea faigofie o le matua tele lava o le tulaga lena. E tele sui o le a le mafai ona tauva ai. O lona uiga o lau aotelega o le Tulafono lenei ma le suiga lenei e puipuia ai tagata o lo o i totonu o le Palemene lenei ma toe taofiofi ai ma avanoa o isi tagata o lo o fia o i le tofi. E pei e faapena lou agaga. O lou talitonuga, tatala le avanoa. Tasi le Tulafono mo tagata uma, afai ua monotaga ia monotaga foi tagata la. Afai ua tautua latou, tautua foi tatou, tutusa. Ae le faapea e o latou ave le \$100.00 i le au soka e o ai i le Palota ae tautua tatou i tatou nuu i le tele o aso ma taimi ma tausaga. Pau lava lea o le mea lea e tau avatu. A ua tatou o loa i le tautua alu ai i le tautua, leaga o le ala i le pule o le tautua. E leai se Samoa e nofonofo lava matai. O le matai o le matai o le aiga, e le o se matai o se nuu, e le o se matai o se itumalo. O le matai o le aiga e faamamalu e le nuu ma le itumalo a o le matai o le mea a le aiga. Ioe, lea na saunoa mai le lauga umi a le Afioga i le Tamaitai Minisita talu ai, faa-matai, faa-Samoa, faa-matai, faa-Samoa. O lea la ua matua leiloa pe faapefea ona fai i le Tulafono lea ma le mea lea ua aumai nei, i sui ia o le a o i le taulaga. Ua tele le vavao o le Palemene lenei ma tele Tulafono e sui o le tatou taumafai e puipui Nofoa nei. A ua oo lava i le taimi ua uma ia ua uma ae faaoga le suafa matai e alu e palota mai ai, ioe.

**Afioga Maualaivao Pat Ah Him:** Lau Afioga i le Fofoga Fetalai.....

**FOFOGA FETALAI:** O lea ua faaii mai le saunoaga a le sui usufono mamalu, lea o le a faamavae mai ona avatu lea o le avanoa i se tasi o sui usufono mo Palota Taitoatasi, Afioga Maualaivao Pat Ah Him.

**Afioga Maualaivao Pat Ah Him:** Ia o le a ou le toe popole foi i ai, se i maua sou avanoa.

**FOFOGA FETALAI:** Ia o le a maua lou avanoa. Le sui usufono mo Faasaleleaga Nu. 3 lea sauni mai, se i tulai mai le sui usufono.

**Tofa Tuileutu Alavaa Voi (Faasaleleaga Nu. 3):** Faafetai mo le avanoa. Ae o upu a le atunuu, a siliga i le faa-faletui saili i le fale pogisa.

**FOFOGA FETALAI:** Malie lava le sui usufono mo Faasaleleaga Nu.3, o lea e te saunoa i le Tulafono?

**Tofa Tuileutu Alavaa Voi:** Ia o nai motugaafa.

**FOFOGA FETALAI:** Oi ia malie lava la, se i faamaea mai le saunoaga a le sui usufono mo Faleata Sisifo, faapea o se mea e fia faasao i le saunoaga lea. Ia le sui usufono mo Faleata Sisifo ua maea lou taimi, alofa mai le sui usufono ou te iloa e umi le taimi o le faasologa o lauga a sui usufono e le i saunoa.

**Tofa LEALAILEPULE RIMONI AIAFI:** Lau Afioga, a le tusi lea. O le tusi lea na ou alu aumai ananafi ou te faitau ai. Political representation and womens empowerment in Samoa, ua le maua se faa-Samoa. O le tele lava o latou mea ou te le au i ai. A o le mea lea faamanino mai i i tusa o le 5% o tamaitai lea matai la i totonu o faiga-nuu. Ioe, o le ala lea o lea ou te taumafai atu ai ona o le tele o isi sui ia ua leva ona sauni. Ia o le a le tala e fai nei pe a tatou taofia ae le tuu e o e fai le latou fiafia.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoui:** Lau Afioga i le Fofoga Fetalai.....

**FOFOGA FETALAI:** Malie le sui usufono, se i tuu atu le avanoa i le Afioga i le Palemia.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoui:** Lau Afioga i le Fofoga Fetalai, e i ai lava si mea sia e popole ai le taofi, ona o au lenei e faale o manino po o le a ea le mea e ala ai ona tetee i le faamaninoina o le mea lea o le monotaga. A o le mea lenei o le monotaga, i nuu uma lava ma afioaga uma lava, o la e faafogafoga mai matai o le atunuu, tasi lea mea e matua inosia i le fonu a matai, o tagata e leai ni a latou monotaga o faia, aemaise pe a oo ina agai le nuu i se galuega tele o le a fai. Ou te talanoa atu i matai foi nei fai monotaga e le aofia uma ai matai, aua e malamalama lelei lava e i ai matai na o mea faaleaiga latou te faia. A o matai lava ia e fai monotaga o lea e vaaia pea i totonu o le nuu, matai na o lea e agai i ai le taofi. E le o se mea leaga le mea lea o le fai o le monotaga, ma e maua foi nuu maopoopo le pulega, o latou ia e fai monotaga. Aua foi o latou ia o tagata tonu e agaga e atiae le nuu i mea lelei.

O au la lea ou te le o malamalama po o le mea ea e i ai nisi e le o mananao ina ia faamanino tele monotaga ina ia sao ai ma tagata e leai ni monotaga e faia. A oo loa ina saili tagata e aoga mo le nuu, i pulega a nuu, latou e fai monotaga ma fai le tautua, o latou tonu na. A tulai mai foi la e tu i le tofi, e matua iloga ona galue mo le nuu ma le itumalo.

O le mea lena lau Afioga o lea e tau faamanino ai le vaega lea, i manatu ia o lo o aumai pea. Ma o le agaga lea faapea e tasi le Tulafono mo tagata uma, e sao, o le idea lena, e tatau ona tasi le Tulafono mo tagata uma. A o le faalavelave, e le faapena le soifua, e i ai lava vaega e tatau ona fai iai se tulaga faapitoa i le Tulafono lea o le faautautaga tatau, common sense ma le tulaga o le itu e le tutusa tagata uma. O le tele ia o tatou Tulafono e aumai nei, e le o iai se tulaga e faalaugatasia ai tagata uma a o lava e taoto le Tulafono faavae Autu, ia taumafai ia faatutusa tagata uma, e oo lava i tatou aiatatau lea e fai nei, lea foi e oo mai i le taimi lenei, tele tagata e faapea mai, e tatau ona taofi le mea lea o le saolotoga o le aiatatau lea i tapuaiga. O la e

sau i lalo o le Faavae, e tutusa uma ai tapuaiga. Ia ona fai foi lea e le Malo le tulaga o mea o tatou Commission of Inquiries i na foi mea, ina ia malamalama ai tagata, e i ai lava le tulaga faigata i so o se mea tatou te faia, a o la e i ai le faautautaga tatau le uta fētāla'i, e mafai ai ona tatou faatinoina tonu e ui e i ai eseese. O mea o diversity foi nei e le mafai ona tatou moeiini ai o tatou mata ma faapea e le tatau ona faapea ma faapea. O le mea lea lau Afioga i le Fofoga Fetalai, o le taofi lea e aumai, ia tasi lava le ituaiga definition e faatulaga ai le tautua i le taimi nei, e le o se mea faigofie. O le mea la lena e moomia ai le tofamamao, le tofamamao la lea e faatulaga ai le Tulafono Tau Faaofi, ina ia mafai ona faatino ai mea e tatau ona fai i le taimi lenei, a o tatou alofaiva i le Faiga Palota o lumanai nei.

**FOFOGA FETALAI:** Ia, faaiu maia le saunoaga le sui usufono mo Faleata Sisifo, ua maea lou taimi, o lea ua tatou....

**Tofa LEALAILLEPULE RIMONI AIAFI:** Ia, faafetai i lau Afioga. A lailoa lava si toeaina e taumafai e faamatalatala mai lenei Tulafono faigata ma le lē talafeagai. Ia manatua foi la, o lea ua tatala le tautua i tagata ia e i i. Ae ia manatua lea na fai atu talu ai, e faapefea la nai tagata ia e nonofo i fanua nei la e fia palota i itumalo nei ae faasasa? O fea la le mea e tatala a o fea le mea e faasa? Afai o lea e lotu i le EFKS i Vaitele pe lotu i le EFKS i Saina po o Toamua ae nofo i uta, e tatau ona tatala le avanoa e palota ai i ina le tagata o la e fia palota. O la e ua aumai le Village Fono Act, leaga le tagata e atamai o le tagata na tusia le Village Fono Act, le Minisita lea e i ai nei. Fai mai e amanaia tagata o lo o nonofo i o latou fanua tumaoti lea e faia nuu, amanaia. Oi e amanaia la i mea e fai a nuu ma le nuu i latou mea e fai, ae a oo i le palota ua le amanaia? A o lea ua ave le saolotoga i tagata nei e fia o i le palota, ave le saolotoga i tagata la e fia o i le palota, ioe.

O le mea lea e tupu lau Afioga, aua tatou te aumaia fua... O lou talitonuga, e sao, e tatau ona i ai se tautua. O le mea lea ou te fai atu ai lau Afioga, ou te le i lauga i se tautua e against i le tautua ua aumai, ua fia tausaga o aumai, leaga e le faapea e tataa tataa omai o i le palota. E leai. Ou te le manao i le mea lea. E tatau ona fai sau tautua i le nuu, aiga, ma Ekalesia ona e alu lea i le palota. E tatau ona fai. A o le mea lea ou te fai atu ai, o lea la ua tautua le vaega lea, ae monotaga tatou. O le a le mea e le tautua uma ai loa? Tautua, ae a omai nai tagata ia e fia o i le palota, ave i ai le avanoa. A o si ona pona, tou te puipui a outou sui, ae le tatala le avanoa mo tatou. Mata ana o matou lea e o i le .... Tou te faia lena mea? Ia tailo.

Ia, lau Afioga, ua lava ia manatu. Faafetai lava i le Matagaluega lea e faia le resitala, malo le galulue. Ioe. E moni lava e faafaigata, ae faafetai. Lau Afioga i le Tamaitai Minisita, a ua maua se aso, e tasi lena mea, o le isi lena mea, ia tofi se Pule o le Matagaluega, e i ai tagata o la e ua agavaa. Ia a tuu ai lava tuu ai lava o le a oo mai le palota? O le mea lea e tupu nei e moni o la e le o i ai se malosiaga atoa o nai tagata e faatino ai le galuega.

Lau Afioga, ua lava ia manatu, o lo o faalogologo mai Samoa atoa, faalogologo mai lou itumalo, faalogologo mai le Atua Silisiliese.

**FOFOGA FETALAI:** Ua maea le taimi o le sui usufono. Tulai mai le Afioga i le Minisita mo Faamasinoga ma Pulega tau Faamasinoga.

**Afioga Hon Fiaame Naomi Mataafa:** Lau Afioga o le mea e fia faasao. O le saunoaga a le sui usufono i le Sui Komesina o Faiga Palota, e leai o la lava o lo o i ai le malosiaga o le Tulafono. Ma ia taatia maia o le matafaioi lena a le Malo, se i e oo mai foi oe i i ona e faia lea o ni filifiliga faapena.

**Tofa LEALAILEPULE RIMONI AIAFI:** Faafetai lava i lau Afioga.

**FOFOGA FETALAI:** Ia, e manatu o lea ua tatou taunuu i le tatou taimi malolo.....

**Tofa LEALAILEPULE RIMONI AIAFI:** Ia, e leai, pe oo atu i ina pe leai, o lea lava e manaia, ta te fiafia. Ia manatua foi o Minisita e le o ni suega mea, e le faia ni suega, ioe. E fai lava i le tofa a le Afioga i le Palemia, o ai lava ua agavaa, ua i ai. O lea lava e manaia si a matou Itu, o lea e avatu manatu. O le manatu o matou, o lea ou te faafetai i le amataga, faafetai i le Faatemokarasi, tatala mai le avanoa e avatu ni o matou manatu. E pule outou, a ia outou manatua, e saunoa soo lava le Afioga i le Palemia i le mea lenei, ou te faafetai i ai, aua ne i galo ia te outou e pei o le mutinitini o le la le silasila a le Alii i Tulafono e fai, ae ese le agaga e fai ai. Ia manuia Samoa. Faafetai.

**FOFOGA FETALAI:** Malo. E fautuaina pea lava le sui usufono mamalu, your time will come, a o lea ua ou vaai atu, your time will never come.

O le a faataatiaese Taulumaga a le Fono Aoao mo lana malologa o le taeao.

*Na faataatiaese Taulumaga a le Fono Aoao mo lana malologa masani i le itula e 10:43 i le taeao ma toe faaauau i le itula e 11:24 i le taeao.*

**FOFOGA FETALAI:** E momoli atu le faafetai ma le faamalo i lenei itula o le aso. E manatu o lea ua tatou toe foi mai i le tatou malologa o le taeao. E maualuga le faamoemoe ua toe maua le faasiliga malosi aua le tauavagameaina o le tatou Tulafono Tau Faaofi ua i le Laulau a Fono a le Palemene. Mai le tatou taimi amata analeila i le taeao seia oo ina fai le tatou malologa, e manatu o lea lava o lo o maua avanoa matagofie a sui usufono, ma o lo o tau tatao pea i le tulaga ona o le talosaga atu i le taimi ua sola, ia alofagia le saunoaga ina ia saunoa sao i le tatou Tulafono Tau Faaofi. E manatu foi o lenei Tulafono Tau Faaofi e le o se Tulafono Tau Faaofi fou ua maea ona outou saunoa i le tulaga lautele i le lautele ma le mafala o le Tulafono Tau Faaofi i ona itu taua, ma timaiga mo le faaleleia atili, ae puupuu lava si mea lea e agai i ai le toe Teuteuga.

Ona talosaga atu pea lea i le agaga faaaloalo e le o ni ai avea tuleiga ma saunoaga ua malamalama ma manino la outou matafaioi o le molimoli mai o finagalo o nuu ma itumalo. Peitai, o le mea lava lea ou te tulitatao i ai o le tatou taimi, o le manumanuga ina ia faaoga tatau tulaga o tuleiga ma saunoaga. Tuu ia saunoaga agai i tulaga lautele, e tae mai sasae ma sisifo ona aumai lea i totonu ma atili ai ona feteenai fingalo o le Maota. E le nofonono foi le Malo i le tutulai mai pe a atagia tulaga i tuleiga ma saunoaga i mea e laga i saunoaga a sui usufono.

A o le tatalo lava ia, o le tofa faatamalii e sui tonu lava le mata o le niu, e fagatonu foi le malama. E le o se Tulafono e tau faapulapulaina le mataupu lea tatou te i ai, o le monotaga, o le tautua. O le mea lea tatou te faia i taimi uma o le aso. O le mafuaaga foi lea na mafua ai ona outou afifio mai i le Palemene, ona o a outou Afioga o tagata sa tautua i nuu, e fia tausaga na tusiaa o ai finagalo o itumalo taitasi tatou te omai e fai upu o le atunuu. E ala ona omai, e pei ona saunoa nisi o sui usufono, o le ala i le pule, o le tautua. O lea la ua tatou seei i lenei foi Paeaiga ma le faalagamaea a le atunuu, ae taua o le agaga o lo o tau faapulapula ma le faaaliga o outou finagalo. O le toe tatalo atu lea i le tatou Maota, e matau atu e leai lava se sui usufono e le fia saunoa, ona o le anofale lea o le tatou ulufale i le Maota lenei, e le mafai ona e sau iinei pe a le faia sau tautua.

A o le tatalo lava ia a le Fofoga Fetalai, ia tausisia tatou Tulafono Tumau e oo foi i tulaga o a outou tuleiga ma saunoaga, e le tau fai atu, o lena e i ina le tofa ma le faautautaga, e tou te saunoa foi ae seu le manu ae tagai i le galu ne i avea foi le naunau e faaaliga finagalo e soli ai nisi o tatou Tulafono e tausisia ai le vafealoai ma le va aloaia i totonu o le tatou Maota.

E faia le tatou malologa ua faaiu mai le saunoaga a le sui usufono mo Faleata Sisifo, o le a lafo i Salafai. Tulai mai le sui usufono mo Faasaleleaga Nu.3, ona lafo ai foi lea i lea itu o le Maota i se tasi foi o fia faailoa mai e fia saunoa. Tulai mai le sui usufono mamalu.

**Tofa TUILEUTU ALAVAA VOI:** Faafetai tele i lau Afioga i le Fofoga Fetalai mo le avanoa ua sau i lenei vaega o le aso. Ou te manatu foi ua uma ona tai le soa i le taeao, o lea ua talitonu ua toa foi lenei vaega o le usugafono a le tatou atunuu.

Ae leai e le o se mataupu tele foi, na pau lava le agaga isi o ta ita foi manatu i le upu lea tautua, e le auese i le agaga ua momoli mai ai le Tulafono Tau Faaofi ma aiaiga foi. A o le upu tautua ma le upu monotaga, ioe. Ou te faatusa le monotaga, talu ai o lenei vaitau vaeane le paia o le faafofoga a le atunuu i le aufaitofa ma le aufaiuta vaeane le Maota, e pei lava a tau le monotaga o le mea lava lena e tasi. Ae i le anoliu, i le vaai i taupulega ma tulaga o le monotaga, e pei o se afa foi lea na ona pipii atu i ai, a o le tautua e pei e foliga o se mea atoa. O pine o lo o iloa ai lenei vaega, aemaise lava i tatou, vaeane foi le paia o a outou Afioga i sui usufono ma tulaga o osiganuu ma pulega matai ma tulaga, e itiiti lava se mea o lo o aofia ai le upu monotaga, i lo le nofo tuavae i le nuu. Ioe, e tautua upu, tautua toto, e tautua i le tu, o le savali, o le tofa, o le saunoaga, o le faatinoga, o le osiga o le nuu. E pei o mea ia.

I le vaai foi la i ai i le monotaga, ina ua vaavaai totoa i lenei foi vaitau ma le tatou mataituina, a leai lava se mea e faia i le tausaga a le nuu, e leai lava se mea e faia a le monotaga, aemaise lava e fuai fai mai ma o ane uma ai malaga mai o tatou aiga ma e ua tofia ua ave i ai paia ma mamalu ma tulaga, ioe. E le na ma le laina lea mea. Ae o le tautua e te moe i ai e ala i ai, e eseese mea ia. O le uiga la lea e ao foi ona faamamafa. O le pine, a leai se tai \$10 a le nuu o le faleaoga o le a, o le a, e leai lava i le tausaga. A o le tautua i le aiga, le mamalu ma le pulega faamatai, ioe, e fai ai nei, o taeao, o mea uma. E le gata la o le Ekalesia, e oo foi i le faatinoga o le lotoifale o aiga ma nuu. E pei na o le pau la lea o si au vaai i ai, e mama, e tala tuu mai le upu lea monotaga, i le upu monotaga tautua po o se tulaga faapena. Po o le a foi se ituaiga faauigaga

e fai fai matai ma o... E a, o fai se monotaga? Ae a leai lava se mea e fai i le tausaga lenei a o le saofaiga,...ua a alii? O le a le mea ua leai ai sau mea e faia? Ioe, o galuega faatino o mea uma, taulamua i le osiga o galuega tetele, e le gata o le lauta po o tulaga uma. Ae pei o le uiga lena o lota ita manatu ina ia toe silasila i uiga ia e lua. O lea la ua faatupu manatu aemaise lava ia tatou osinuu ma tatou tilotilo, a sasau nei lava le pisupo tolu pauna, ma le a, ma le a, e moni e maua, ae taua le afio mai i le tala, alaala mai i lou talaluma, ioe. O le tofa e saili ai le manuia o nuu ma afioaga. E pei na pau lea o si ou manatu, e le mamao tele foi se auese ae o le fetuunaiga lea o lo o i ai aemaise i la outou Afioga, i tatou ua tofia i le tausiga o nuu ma aiga, tatou te lagona lava o le monotaga, a leai se mea e faia i le tausaga, e leai lava se mea e faia. Ae manatu o le osiganuu, o le aso, taeao, afiafi ma aso uma aemaise lava le Ekalesia ma ona foi tulaga faapena ma ona vaega uma. E pei ona pau lea o si au soso atu ma le faaloalo. Ia manuia tele le tatou Fono.

**FOFOGA FETALAI:** Malo le saunoa i le sui usufono mamalu. Malilie sui usufono o lea ua ou matauina uma outou lea na maitau atu, malie le sui usufono mo Faleata Sasae o lea o le a lafo i le isi itu o le Maota ona tatou felafolafoai lea, lau Afioga i se tasi o sui usufono mo Faasaleleaga Nu.1, Afioga Hon Gatoloaifaana ona sosoo ai lea ma le sui usufono mo Faleata Sasae.

**Afioga Hon. GATOLOAIFAANA AMATAGA ALESANA GIDLOW (Faasaleleaga Nu. 1):** E muamua lava ona faafetai tele i lau Afioga i le Fofoga Fetalai mo se avanoa foi e faaali ai se manatu e tusa ai ma le tatou Tulafono Tau Faaofi. E faapea foi ona faatalofa atu i le paia o le tatou Palemene ae le gata i lea, o le faafogafoga mai a Samoa.

Lau Afioga i le Fofoga Fetalai, ae le i amataina se manatu e agai le Tulafono ou te lagona lava e ao pea ona oo sau faamatalaga i le faalogologo atu i lenei foi taeao i folasaga ma saunoaga a le tatou Maota nei. Ua ou manatu ai i se tasi o tatou Tulafono Tumau, o le aafia o ē e le o mafai ona tali mai i saunoaga i totonu o le tatou Maota. Ou te lagona e i ai ni saunoaga ua fesiligia ai le agavaa o le tatou Loia Sili, e i ai se manatu lau Afioga i le Fofoga Fetalai, ina ia aveesea nei saunoaga mai tatou faamaumauga ona e le o mafai ona tali mai e ia e pei ua lavea fua foaga e le i fai misa, ona o tatou lava saunoaga i totonu o le Maota. Ae o le a agai sau faamatalaga i lenei Tulafono. Ou te muamua lava ona momoli atu le agaga faafetai i lenei Tulafono i le Tamaitai Minisita ma le Matagaluega aua o le aumaiga o le Tulafono ma le faamanino mai o le monotaga ma le tautua, ua ou lagona ai ua toe fafagu mai ai le taua o le faamatai o lo o faavae ai le tatou aganuu. O se tulaga e tulaga ese ai Samoa i atunuu uma o le atu Pasefika po o le lalolagi foi. O le faataua foi lena na ave ai i ai e o tatou tuua sa latou fauina le Faavae o Samoa i le ave ai o matai i totonu o le Palemene latou te lipoiina Tulafono, faaiuga e limataitaiina ai Samoa ma ana mea e fai ina ia tumau ai pea le toafilemu i totonu o le tatou atunuu ae amata mai lava i tua i tatou nuu ma alaalfaga.

O le agaga faafetai lena i le toe faatulai mai ua toe faamanatu mai ai ma toe faataua ai le faamatai i totonu o le tatou tu ma aganuu faa-Samoa ma faamanatu mai ai le agaga e ala ai ona filifili e aiga nei mea o matai, e le ina ia tau ina uma, malaga atu, afio, papaaao i fea ma fea ae leai se tautua i totonu

o le aiga, nuu ma alaalfaga e ala i nei mea o monotaga. O lea ou te faafetai tele lava aua o le isi lava mea sa fautuaina ai tatou tuua sa faapea ona latou taumafai maia le Faavae o le tatou atunuu, aua nei faamaamuluina lau aganuu, ou fanua ma lau gagana. O le faamatai o se vaega taua lea o tu ma aga faa-Samoa. Faafetai tele i lau Afioga i le Minisita i le aumai pea o mea e fafagu mai ai aua tatou te see ese ma Faavae taua e tatau ona tatou mulimulitai ai.

Na ou vaavaai lau Afioga le Fofoga Fetalai, na i ai le popolega i lou nei sui usufono i le Vaega 3(a)(b) ona e pei foi ona malie le faalogologo atu i nisi o sui usufono mamalu o le Palemene ma latou saunoaga i le eseese foi o vaega o lo o tuu ai le monotaga faapea le tautua. I lau faalogologo atu, o le tofa fetalai ona o lenei foi vaitau ua tatou lalata i le faaiuga o lenei foi Paeaiiga, e tele foi ni suiga ua tatou agai atu i ai e ao ina tatou vaavaai ina ia aua ne i afaina tele, ae i ai taimi o le lumanai ona faapena lea ona aumai ni mea mautu e laugatasia uma ai le agavaa o sui usufono taitasi mai itumalo i totonu o le Palemene. E pei o le tulaga lea e tatau ona suafa matai, o lea ua faaopoopo mai ai ma le monotaga ae ui lava o lea o lo o eseese le monotaga mai sui o itumalo i tua faapea le tautua mai afioaga o nuu tu taulaga, a o lea ua ou faalogologo atu o le tofa fetalai ona o le lalata o tatou i vaitau o palota ma le faaiuga o lenei Paeaiiga o lea e faataatia ai faapea, ae le uma ai le toe Teuteuga ina ia faamautu ai se faamoemoe mo le tatou Tulafono. O le mea la lenei ua tau filemu ai lota mafaufau aua a tatou o lava i le mea tau monotaga po o fea lava e te matai ai ma e alaala ai, ae fai pea lau monotaga i le mea na afua mai ai ona faasuafaina oe i le suafa matai, avatu ai le faatuatuaga a lou aiga ia te oe, e te tausia, puipuia ma faaeaea lou aiga e ala i le suafa matai.

O le agaga lenei lau Afioga i le Fofoga Fetalai, ma e po o fea lava tatou te agai i ai, o le popolega foi o lea ua toe aveese igoa o nisi sa sauniuni a o lea ua le atoa le latou tolu tausaga, o lou manatu lau Afioga i le Fofoga Fetalai ma le mamalu o le Palemene, se ua tatou tautala soo i nei mea o filiga ma tofiga a le Atua. E te fanau mai, tulouna se upu e to ia te au, ua i ai le finagalo o le Atua mo oe e tapena mai lava oe mo le finagalo o le Atua seia oo lava ina aumai foi lona finagalo e toe tapena atu. O le faaiu ai lenei o sou manatu lau Afioga i le Fofoga Fetalai, manuia tele le tatou Fonotaga.

**Tofa Aveau Tuala Lepale Niko Palamo:** Lau Afioga i le Fofoga Fetalai.

**FOFOGA FETALAI:** Malo faafetai saunoa. Tulai mai le sui usufono mo Faleata Sasae ona sosoo mai ai lea ma le sui usufono mo Faasaleleaga Nu 4, ona lafo mai loa lea i le isi itu o le Maota i le sui usufono mo Palauli le Falefa ma faasolosolo mai ai.

**Tofa AVEAU TUALA LEPALÉ NIKO PALAMO:** Faafetai lava i lau Afioga le Fofoga Fetalai, faafetai foi i manatu faaalua i lenei Tulafono ma e momoli foi le faafetai i le Afioga i le Tamaitai Minisita aemaise foi le Matagaluega. E ui lava o lea e aumai lava suiga o le Tulafono, ae atonu foi o le Tulafono e fai ai nai manatu.

Ou te faatulou atu i le paia ma le mamalu o le Palemene, a o lea o le a ou tautala sao lava i le uiga o le Tulafono Tau Faaofi. A tagai i le Tulafono Tau Faaofi lenei, o lea ua faavasega mai ai vaega taitasi lea na fesiligia i le tele o tatou lauga, aemaise lava o au nei o lea sa ou fesili soo lava i le definition o le

upu lea “tautua”. A tagai la i le Tulafono Tau Faaofi lenei o lea ua sau ai le Community, nuu ma afioaga, e tusa o lea ua faa Samoa le “Community” o “nuu ma afioaga”. O ai lea e faatatau i ai nuu ma afioaga i totonu o le Tulafono Tau Faaofi lea? O nuu i totonu o le urban, nuu i totonu o le taulaga, nuu ma afioaga. O Tulafono uma lava ia lea tatou te taumafai e faatino, o lea tatou te taumafai e sui le upu nuu, nuu ma afioaga. O lea e fai mai le Tulafono lea, pau lava le itumalo e faasino ai nuu ma afioaga o le urban, o nuu e i totonu o le taulaga.

O le Vaega 2, o le “monotaga”. O le monotaga lea e faasino mai i i, o le monotaga a matai i totonu o le nuu lea e te matai ai, lea e sau ai le monotaga. O le upu “tautua” lea e sau i i e na o lau tautua i le urban, nuu ma afioaga, e le o lavea ai sau tautua i totonu o... O lea foi e fai mai le faaupuga mai le monotaga i i, o le tautua pe a vaai i lalo o suiga lea e suia ai le upu faamatalaga po o le schedule lea e faamatala ai le mea lea e saina i lalo, monotaga po o le tautua faamalosi. O lau fesili, o le a le uiga o lea mea o le tautua faamalosi? O le a le uiga? O le a le mea ua le aumaia ai i i se uiga o le upu “tautua faamalosi,” ia iloa ai po o le a le uiga o lea vaega o le tautua? O lea foi e fai mai le Tulafono, a e alu e te fia sui tauva, fai lau monotaga. O lona uiga e tatau ona e i totonu o le nuu pe afai o oe o le sui mai totonu o le nuu. A e alu e te tauva i le urban o le tautua, nuu ma alalafaga. O lea la ou te fia malamalama ai, o lea lava tatou te vavao i le upu tautua, a o lea e le o fai maia se tautua i totonu o le nuu. O le monotaga lea e refer i ai, ma o le mea lea e tau o le tautua faamalosi, faitau lea i ai i le Tulafono lea e sau ai le vaega lea. O le mea lenei lea ua ala ai ona ou fia malamalama i le vaega lea, o le a le uiga o le upu tautua, community service aua o lea e fai mai o le service, lona uiga a tatou alu i mea sao o le Tulafono, sau loa i lalo o le sui faatu, fai lau monotaga, fai lau service i totonu o le nuu uma, pe afai e faamaoni le Tulafono lenei. Afai e te fia alu e tautua, fai lau monotaga muamua i lou nuu e te i ai, fai lau service po o fea e fai ai lau tautua, aua o lea e fai mai i i, aua a tilotilo i lalo o le (b) lenei e sau ai lalo le mea lea, lau Afioga o le a ou faitau atua le vaega lea, “tautua i le nuu o lona uiga, monotaga e tuuina atu e se sui faatu” e uiga la i le upu lea monotaga i luma o le nuu, i le alalafaga po o se tautua i se nuu ma afioaga. O nuu ma afioaga lea e refer ai le mea lea o le urban, e le o refer ina i nuu lea e matai ai tatou. O le tautua lea e refer ai le mea lea, o lea e refer i nuu ia, mo se faataitaga, o Faleata, e nofo ai le matai e so o se mea e sau ai, ae tautua i se nuu i totonu o Vaimoso, Lotopa, Sinamoga, o ina la lea e refer i ai le mea lea. A o fea la le tautua i le nuu e matai ai? O fea? E leai se mea i le Tulafono. O lona uiga e so o se tagata e matai e nofo i totonu o urban seat e le tautua, leai se monotaga e faia i le nuu o lo o matai ai, e mafai ona run i le seat lea. O lona uiga, o se matai na faatea mai i alalafaga o lo o matai ai, sau nofo i totonu i le vaega lea e mafai ona run ai i i. Aisea? A lea e fai mai le Tulafono lea.

O le mea la lenei o lea ou te tatalo atu ai i le Tulafono, tagai le Tulafono i i i le vaega lea, e tatau ona faapea mai, i lalo o le faaupuga o le pepa o faamatalaga, tautua i le nuu pe faapea mai i le nuu ma le itumalo, sa tatau ona faapea mai le mea lea, o le tautua i le nuu, le service lea e sau i lalo i i, le village service, lea e sau i i e lua vaega o le village service lea e faaupu mai ai i i. O le village service muamua (a) o le monotaga e refer ia tatou nei e tautua i le nuu, (b) o le tautua e refer i le tagata lea e tautua i le Urban Seat. A o le a le mea e le faapea mai ai le Tulafono o le sui faatu, ia fai lau monotaga, fai



lau service i totonu o le nuu e te matai ai, po o totonu o le Urban, uma laia lea, ona faigofie lea o le Tulafono. O lona uiga, a sau le matai e nofo i totonu o le Urban Seat lea, Vaimauga po o Faleata, a fia alu i le Seat, e tatau lava ona tolu tausaga o la e fai lana tautua i le nuu na matai ai, e tatau lava, fai ma lana tautua i totonu i le mea lea e i ai i i, pe lotu ai i i se lotu i i, pe peresetene ai i se au lakapi, pe taitai se au netball, o le vaega lena o lea e fai ai i i le tautua lea. Ae tatau i lalo o le Tulafono, ona i ai se puipuiga e tolu tausaga foi, e tatau ai ona tautua le tagata lea i le mea lea e matai ai. Aua o le agaga lena o le Tulafono, o le agaga tonu lava lena o le Tulafono Tau Faaofi, e tatau ona tatou o e tatou te tautua i le mea na tatou matai ai, ia o le uiga la lea o le Tulafono Tau Faaofi, ua tuli mai i o i Savaii leaga le tautua, sau faatau le fanua i i i Vaitele po o Vailele, sau loa alu i i i le mea lea. E leai ma se mea o le Tulafono Tau Faaofi e faasa ai le tagata lena, o lea e faataga, o ela e faataga leaga o lea e fai mai le tautua lea i i, tautua nuu ma afioaga. O lea foi la ou te fia malamalama, po o le a le mea ua ala ai ona faauiga faapea nuu ma afioaga. A o le tele o Tulafono ia tatou te faia nei, o lea tatou te taumafai e sui le upu, nuu, sui le upu village, nuu, sui i le nuu ma afioaga. A o lea ua fai mai ua faapitoa lava le mea lena i le nuu ma afioaga. O le mea lea ua ala ai ona faapea le Tulafono Tau Faaofi lena.

O lea la ou te tatalo atu ai i lau Afioga i le Tamaitai Minisita, e toe silasila ifo i le Tulafono Tau Faaofi lena. E tusa o lea na saunoa nisi i le uiga o le monotaga. A o lea e fai mai i le monotaga, tautua faamalasia, lea e aumai i lalo i i i le taimi e faatumu ai lau pepa foi lea, a faatumu lau pepa ona faapea lea e tatau ona fai lau monotaga. O le monotaga lea e uiga mai i i, o la e i ai totonu ma le tautua, a o le tautua la e sau ai i totonu, tautua faamalasia. E tatau la ona aumai i i i le definition, o le a lea mea e tau o le tautua faamalasia?

O le agaga lena o sou manatu lau Afioga i le Fofoga Fetalai, i mea lava ia o le Tulafono Tau Faaofi e tatau ona tagai i ai, leaga e le faigofie i itumalo nei i totonu iinei ona faatino le vaega lea, o le mea lea foi lea e i ai ni manatu i vaega ua tuanai, leaga ua tea na vaitaimi. A o lea la ua talanoa atu i le faauigaga mai i i, se i toe tagatagai ane i i, aua e tatou te fiu lava e finau po o le a le upu monotaga, a lea ua tau mai i i, o lea ua spell out mai i i le monotaga, po o la isi monotaga ia tou te fai mai ai, e le taua, e taua mea lea e i totonu i i, e faapena foi la i le tautua. O lea ua tau mai ai i i, e pau lava le tautua e talia, ia o lau tautua i totonu o le Urban Seat.

Ma le faaaloalo lava.

**FOFOGA FETALAI:** Malo faafetai. E manaia tele lauga pupuu ia, straight to the point, e le tae otaota.

Ia le sui usufono mo Faasaleleaga Nu. 4, ona sosoo ai lea i lea itu o le Maota i le sui usufono mo Gagaemauga Nu. 2 ma faasolosolo atu ai, oi i le sui usufono mo Palauli le Falefa.

**Afioga PESETA VAIFOU TEVAGA (Faasaleleaga Nu. 4):** Faafetai i lau Afioga i le Fofoga Fetalai, ua maua foi le avanoa o lena itumalo e avatu ai sona sao i lena Tulafono Tau Faaofi. E pei foi ona silafia e lau Afioga i le Fofoga Fetalai, e tasi lena Tulafono Tau Faaofi i le Fono talu ai sa malosia ai foi se leo o lena itumalo, ona o le tulaga lea i le Tulafono Tau Faaofi e pei ona faataatia i le tautua ae le i aumaia ai le monotaga.

Lau Afioga i le Fofoga Fetalai, atonu foi ua tele lava finagalo ua faaalua i le eseesea o le tautua ma le monotaga. Ma i lou lava lagona i le taimi na avatu ai se manatu, o le tautua, pei o lea ua talanoa faalauaitele, general, a o le monotaga, o lau tautua lea faamatai i totonu o nuu ma afioaga. O le tautua, e fanau mai loa le pepe i totonu i faigamea a nuu ma ekalesia, e fai le taulaga a le pepe lea i totonu o ekalesia, faasolo ai lava i le fanau a le toeaina ma le loomatua, e tusa la ua amata mai ai i lana tautua, lima, ono tausaga ua mafai ona tamoe le pepe lea, ua tuli e le tama e alu e ave le suavai a le faifeau, a o lea e laitiiti, tasi lene tautua, se i oo lava ina ave ma aumaga o nuu tautua faale-aumaga, oo loa i le taimi ua finagalo ai le aiga po o le matai o le a faamatai le tama lea, o le aso lava e fai ai le matai, o le aso foi lea e tu ai ma le finagalo o le nuu, e manaomia ia monotaga a au matai. O lea la ou te avatu e au ia i totonu lava o lou nuu ma lou itumalo faiga ia. E aumai lava le finagalo o le nuu i lea aso lea. Afai e leai se monotaga, e le faaaogaina e nuu, pe e te nofo lava la i totonu o le nuu i le fia tausaga, ae leai sau monotaga, e le amanaia oe e le nuu, e le faatauaina foi oe e le nuu, e na o lou lava aiga. O ai la e faia tonu o nuu? E fai e matai. O ai la matai? O matai e fai monotaga, e le o sau faapea o matai tautua, o matai fai monotaga. O latou ia o lea e fai i ai faaiuga a nuu i mea e fai, o latou ia o lea e tautua le mamalu o le pulega a alii ma faipule o nuu. Po o le a lava la le matai ua fia tausaga, o fea e nofo ai ma fai ai lana tautua, ae a leai se monotaga e fai i totonu o lona nuu, e le faaaogaina e nuu. Afai foi la o le a fonoa se afioaga, e na o e lava e fai monotaga e omai i totonu o fononi. Pei foi ona saunoa nisi o Minisita po o nisi foi o sui usufono i le taimi ua sola, pei o ni faaoso po o ni mea faapena e maua i totonu o nuu, ia e alu la i monotaga. E le faapea e na o le sao o se aiga, leai, leaga a fai saogatupe a nuu, e le na o sao o aiga lea e tautua i ai matai ia po o vai matai, leai e alu lava i le matai o lea e fai lana monotaga. O le taua lene o le monotaga. A o le tautua lea ua suia nei o lea ua tuu i ai le monotaga, ia o le tautua lava lene ia faalauaitele a le tagata ia e le gata i lona nuu po o lona aiga i mea e fai. Afai o se sailiga tupe a se nuu po o Savaii po o nuu i tua, e fai i Apia nei ma faasalalau i le TV a o ta ita e nofo i le isi nuu a o lo ta nuu lea, e ta te vili mai lava, ia tusi ane le tupe lea e fesoasoani atu ai i le tatou nuu, ae le o i ai sa ta monotaga o fai i le nuu, o le tautua lava lene. Talu ai la o le Tulafono Tau Faaofi lea ua faataatia, o le Tulafono faapitoa o Faiga Palota, e le soona filifilia la, e le tuufaatasia ai ia lapopoa ma ia laiti. O le Tulafono Tau Faaofi lea, e fili ai le tofa ma le faautautaga a nuu ia i latou o lo o fai monotaga ma tautua nuu, ua tataua ma agavaa. O lea foi la ua aumai i le Tulafono Tau Faaofi ia tolu tausaga. E tele ia matai ua tai lima tai ono tausaga talu ona lesitala matai, ae leai se monotaga o faia, ma ou te fai atu lava i le Tulafono Tau Faaofi lenei ou te momoli atu ai lau faafetai i lau Afioga i le Tamaitai Minisita, le Loia Sili ma le Matagaluega, faafetai o lea ua tuu i ai le upu lea, 'monotaga,' leaga sa matua avatu malosia i lau lauga le mea lea, leaga a tuu aunoa ma tuuga o le monotaga i le Tulafono Tau Faaofi lenei, ou te fai, ou te le iloa po o le a le faaiuga e mafai e le Faamasino ona fai. E le mafai e tamaitai ma alii faamasino fai ni ana faaiuga i ni taimi o le a oo ai le mataupu lenei i le Faamasinoga, leaga o le tautua o le mea lautele, a o le faigofie ia o le monotaga, na ona molia atu lava i le Tulafono e leai se monotaga, tapa le Faamasino, aumai le pulenuu, aumai ni sui o le nuu. E so o se nuu lava, e i ai le api a le nuu, e i ai le api e lau monotaga. O ai e le i faia se tupe, e faapena. E leai la se mea e faigata ai i le Tulafono ona fai lana

faaiuga, pe a maeaea ona avatu i totonu o le Maota lenei ia vaega taua nei e faigofie ai galuega a le Faamasinoga. O le agaga lena, e momoli atu ai lau faafetai i lau Afioga i le Tamaitai Minisita, e momoli lau faafetai.

Na aumai ni finagalo a nisi o sui usufono mamalu i Nofoa ia e lua, ma atonu foi o Nofoa nei ua faapenei ai ona tele finagalo ma vavao le Maota lenei. E avatu ai se tuualalo i lau Afioga i le Minisita mo nisi po o le lumanai ma le Paeaiga, e toe silasila i le Teuteuga o le Tulafono i Nofoa nei e lua ina ia paleni lelei mea uma, paleni, fai monotaga i a matou Nofoa po o tatou Nofoa po o Nofoa ia e lua. E le mafai ona fai monotaga na o isi Nofoa ae faaavanoa Nofoa nei e leai ni monotaga. O lea tou te aumaia, o le ala i le pule o le tautua. E faapefea ona tautua ae le o tautua i i i le nuu? E lagolagoina e lou nei sui usufono le suiga lea ua i ai ona o le taimi ua vave le Faiga Palota, ae mo le lumanai, e tatau ona toe silasila lau Afioga i le Minisita i se faiga aua o le mea moni lava, ana paleni mea ia, e le vavao le Maota lenei, leaga o le tagata tausinu e le faigofie lana galuega. O le tagata tautua e le faigofie lana galuega....

**Tofa Lealailepule Rimoni Aiafi:** Lau Afioga i le Fofoga Fetalai.....

**FOFOGA FETALAI:** Le sui usufono mo Faleata Sisifo, o le a se mea ua....?

**Tofa Lealailepule Rimoni Aiafi:** Faafetai i le saunoaga matagofie a le sui usufono, ona o lea ua toe saunoa i le mea lea, o le ala i le pule o le tautua. O lona uiga, o lea la ua fetau tonu lava i sui o le taulaga, o le ala i le pule o le tautua, aua o lea na o le tautua, a o lona uiga la o sui o tatou ia e o i le nuu, o le ala i le pule o le monotaga, a? Ae faafetai lava i le sui usufono, e ese le mamao o le tofa, faafetai.

**FOFOGA FETALAI:** O le mea lava e tasi, ioe, o le faamalosiga ma le atoaga lena o le tautua. Silasila foi o lea e manino lava le faamalamalamaga a le sui usufono, e lua lava vaega lautetele ia o lea ua manaia le saunoaga a le sui usufono, e le atoa lau tautua pe a leai le mea lea. O lona uiga e tatau ona...Tulai mai le sui usufono, o lena e manaia lava lau palasi lena.

**Afioga PESETA VAIFOU TEVAGA:** Ia leaga ua seu mai e le sui usufono mo Faleata Sisifo le lauga.

A o le agaga lena o lou itumalo. O lea ua taumafai le tatou Palemene e tatou te o i le faamatai o le faaleaganuu lena, e le mafai ona nofo nofo lava le tagata alu i le Faiga Palota, alu muamua i le matai, matai e fai lana monotaga, o lau tautua lena, aua e alu alu lava le malosi o le tautua, gata, gata, ae faaauau pea le malosi o le monotaga, pe a oo loa o le a oo i totonu o pulega o pule mamalu a alii ma faipule. O le a foi le tele o tausaga e te matai ai ma e tautua i lou nuu, e tasi lava le sasi i totonu o le nuu, fai le faaiuga o le nuu, a le o le faatulai o oe, e faatea. O le taimi lava e faatulai ai ma faatea, ua muta ai foi i ina ma le monotaga, ua e le toe lavea foi i upufai o le nuu, i mea e fai a le nuu ia ma mea e maua a le nuu, seiloga foi la ua finagalo le nuu e toe faaae oe, ona e toe lavea foi laia i i i le vaega lea. Ae pei ona ou avatu ona o le tulaga lea o le Tulafono Tau Faaofi lenei, e pei e faapitoa le Tulafono Tau Faaofi lenei o le Faiga Palota. O lona uiga, ua matua talia e lenei itumalo le suiga lea

ua i ai lau Afioga i le Tamaitai Minisita, e matua avatu le lagolago i le suiga lenei. Ae pei ona ou avatu ona ua vave le Faiga Palota, ae mo nisi Paeaiga, e tatau ona toe silasila ina ia tutusa uma Tulafono o Nofoa o le Maota.

Manuia lau Afioga i le Fofoga Fetalai, manuia le Fono.

**FOFOGA FETALAI:** Malo saunoa. Ia o le a sosoo le sui usufono mo Palauli le Falefa, sosoo ai lea ma le sui usufono mo Falealili, ona sosoo loa lea ma le sui usufono mo Gagaemauga Nu. 2, tulai mai le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, lau Afioga i le Fofoga Fetalai talu ai o le mataupu lea sa ou faamamafaina i lau tautalaga ina ua talanoaina le tautua. Ona o le faatauaina o lou auai i tonufai o afioaga ma alaalfaga. E ala ona ou faatauaina le monotaga, ona o le aoga ia o le auai o matai o nuu e le gata o lenei Palemene a o sui o afioaga ma alaalfaga o lo o afifio ma papaaao i totonu o le taulaga ona o galuega, faaaogaina o le fanau, ma isi lava tu faapena o le olaga o tatou o i ai nei.

E pei o lea ua faamamafa mai e le Teuteuga tulaga ia o saogatupe ma mea faapena. A o tua atu o mea ia sa taua e nisi o sui usufono na saunoa, o i i le monotaga lea e fesootai ai matai o afioaga ma alaalfaga i le Fono a Nu, o i e see ai le nuu i tulaga, a oo ina fai Tulafono, o lona uiga ua seek le nuu i le tulaga faa-Palemene o nuu taitasi. A oo ina see le nuu i le faiga o faasalaga, ua see i le tulaga faa-Faamasinoga. A oo foi ina see le fono a matai o nuu i le tulaga o atinae, ua see i lona tulaga faa-Kapeneta. E tolu la matafai oi a so o se nuu. O le mea lea e taua ai ia te au, le i ai o le matai i mea e fai ai tonu o atinae a le nuu. E faatauua uma lava mea ia e aumai i i, a o lona anofale lena o lea ou te talitonu i ai, ina ia faapena ona amanaia ai le taua ole auai o matai o nuu i Fono a nuu.

E avatu ai le faafetai tele i le Minisita mo Teuteuga. I le aso ananafi ma faamatalaga na oo mai ia au, e pei o tala salatua. E pei e foliga e maoae le faaletonu o le Teuteuga. A o lea ua ou vaavaai atu i i, e i ai lava nai mea e tuu atu ai lau tuualalo. O le mea lea e faaoga ai le or e tatau ona tuu i ai le and. O le mea lea e faaoga ai le po o, tuu ai ma. Ia aofia ai, ia aua nei foliga e eseese vaega ia e lua. E tatau lava ona fesootai i le tulaga o aganuu ma isi vaega o lau tautua i communities. O le tulaga foi e tau separate ai le matafai oi o ekalesia po o lotu, e le mafai ona tuuese Ekalesia i totonu o pulega a afioaga ma alaalfaga ona o lenei. So o se faifeau lava e ave i se afioaga po o se alaalfaga e osi le feagaiga ma lena nuu. O lona uiga, e i lalo o le faamalumaluga a le fono a nuu. E le mafai la ona solia e se isi, o nei afioaga po o alaalfaga le Maota o le Faafeagaiga pe fai se mea e ono afaina ai lotu ma tapuaiga i totonu o afioaga taitasi.

O le isi mea lau Afioga i le Fofoga Fetalai ou te fia taua i i, o le matai, o le faasinomaga lea o so o se tagata Samoa lava.

**Tofa Lealailepule Rimoni Aiafi:** Lau Afioga i le Fofoga Fetalai....

**FOFOGA FETALAI:** Tulai mai le faauilavea. O se mea e fia faamalalalama pe fia faasao?

**Tofa Lealailepule Rimoni Aiafi:** O le mea lea ua oo i ai le saunoaga a le sui usufono mamalu, o mea faalelotu. Aua o lea ua oo mai i lou mafaufau, ua confuse ua ou le malamalama. Aua i lou lava talitonuga, e ese le monotaga ese mea faalelotu. O le monotaga o le mea faaleaganuu, ou te talitonu na i ai lava i le taimi ae le i kerisiano Samoa. O le Ekalesia... O lau fesili i le sui usufono mamalu, afai la sa ou tautua i le lotu ae leai sau monotaga, e qualify la ou te alu i le palota? Ma lou faaloalo lava.

**Afioga Hon FAUMUINA TIATIA FAAOLATANE LIUGA:** E faigofie lava le tali. Afai o lea e te alu i le TC, o le a le mea e te sau ai e te tauva pe afai e le o faia sau monotaga? A o le Ekalesia ia o le service lena e ese foi lona ia tau. A e faia ma le faamaoni, o lena e te faia ona e te fia alu i le ola e faavavau, ae e te le o faia e te fia sau i le Palemene ona o mea e mavae. A o lea e taua e le sui usufono. O ia o le.... o lea e taua o le Son of the King. E tasi lava le Tupu na o Iesu. A o lea e fia sau i totonu o le Palemene, afai lava e te alu e serve le Atua, fai mea faale-Atua.

**Tofa Levaopolo Talatonu:** Lau Afioga i le Fofoga Fetalai, o le mea e fia faasao. Lau Afioga ua umi lava le saunoaga a le Tiakono Toeaina o le Ekalesia. O lea ua faapea mai a e fia sau i le Palemene fai lau monotaga faalenuu. A faalelotu, ae galo ia te oe, o le Palemene e faavae i le Atua. O lona uiga e tataua ona fai au mea faale-Ekalesia ona mafai lea ona e afio mai i i. E faavae le atunuu i le Atua e faavae ai foi le tatou Palemene. O lena e alu uma mea na e lua.

**Afioga Hon FAUMUINA TIATIA FAAOLATANE LIUGA:** O le manaia ia o le talanoa o le tagata e le alu i le lotu ma le tagata toeititi moe i le falesa. So o se mea lava e te faia e maua ai le viiga o le Atua, o galuega i totonu o le Palemene po o galuega e i fafo atu o le Palemene, so o se mea e viia ai le Atua....

**Afioga Toeolesulusulu Cedric Pose Salesa Schuster (Aana Alofi Nu. 3):** Lau Afioga i le Fofoga Fetalai.

**FOFOGA FETALAI:** Malie le sui usufono. O ou uso a tuaoi lava ia e faalavelave ia te oe.

**Afioga Toeolesulusulu Cedric Pose Salesa Schuster:** Lau Afioga, o le vaega e fia malamalama ona o lea ua taua le vaega lea o le faalelotu. O lea foi e matau atu o lo o faataua i le saunoaga a le sui usufono. Ae peitai ane o le faamalamalama o le monotaga lea e i ai, e faamalasia le fai o mea faalelotu ma le fai o mea faalenuu. O lea e fai mai. O le monotaga o lona uiga o le tautua e faamalasia mea faalelotu. Po o le ala foi lea o le fesili o se tasi o sui usufono, a o lea ua e saunoa, na o le faalenuu. Aepeitai ane o le faamatalaga o le uiga o le upu lea ua tuu mai i totonu, e faamalasia lou faia o mea faalelotu, faamalasia lou faia o lau tautua faalenuu. Afai o lea, po o le sao lea lau Afioga? Ona e i ai le concern afai o lea ua sau le faamalamalama o le Tulafono e faamalasia, ua silafia uma e le tatou Maota nei ma afioaga ma alalafaga. O le tele o monotaga faalenuu e le faamalasia. Aepeitai ane o lea ua fai mai. Afai la ua ao i afioaga ma alalafaga i nuu i tua, ona faamalasia loa

ia monotaga. Peitai ane e pei ona tou silafia o monotaga lava e i ai taimi e avanoa ai ma maua fesoasoani a sui taitasi. A o lea foi la ua fai mai ua faamalosia ma le faalelotu, o lona uiga ua tataua ona fai matafale po o mea fai uma a le lotu. Po o le sao lea lau Afioga?

**FOFOGA FETALAI:** Malie lava le sui usufono, se i avatu le avanoa i le sui usufono mo se mea e fia faamalamalama. Tulai mai le sui usufono mo Faasaleleaga Nu 4.

**Afioga Peseta Vaifou Tevaga:** Lau Afioga i le Fofoga Fetalai, e pei o le upu lea o lea e tele ina fesetetai ai finagalo o nisi o le Maota. O le monotaga e pei e faasino lava i totonu o tautua faalenuu. Ae taua loa Ekalesia ona sui ai loa lea o le gagana, ua le monotaga ae matafale. Aua o le sao tonu lava lea ou te fai atu lau Afioga, aua o lea e aumai soo e nisi o sui usufono, e le aumaia ni maonotaga faaleagaga na o le faa-matafale.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga, out e fia tuliloa le mataupu a le sui usufono mo Palauli le Falefa. O le a le faavae o lou taofi? O lo o faavae ea lou taofi i le fetalaiiga foi lea a Iesu, “a e faia se mea lelei ae tuliloa lou tau i lalo nei ua leai se mea o totoe i luga, a?” E sao? O lona uiga ua maua lou tau i lalo nei?

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Palemia. Faafetai foi i le sui usufono mo Faasaleleaga Nu 4 ua tali mai ae le o le tali lea o le fesili. E sao lelei lava le Afioga i le Palemia. So o se tagata lava e naunau ia maua lona tau i lalo nei, ua leai se mea i luga. Ae na o Paulo lava fai mai, ‘ua lata le taimi e faamaligiina ai lou toto, ua ou faatali i le pale o le amiotonu e faapaleina ai au faatasi ma i latou uma o e alolofa i le Atua.’ E leai la se pale o le aualii ia i luga e uma lava i lalo nei.

Lau Afioga i le Fofoga Fetalai, o le mea lea e taua o le monotaga, lea na ou fai atu ai, o le sootaga o le tausiga o Ekalesia, o le feagaiga i le va o le nuu ma le faafeagaiga na momoli atu e lona aiga e puipui e lea afioaga ma le alaafaleaga. So o se mea lava la e fai e le nuu, e auga uma lava i le galuega a le Atua, o le faamoemoe i le ola e faavavau. Lau Afioga i le Fofoga Fetalai, o le sootaga lena o lea na ou fai atu ai, afai e finagalo i ai le Malo ma le Tamaitai Minisita, aveese le upu “or,” tuu i ai le “and.” Aveese le upu “po o” tuu ai le upu “ma le” i le tulaga lea o le auaunaga mo Ekalesia, leaga e taua. O le taua o Ekalesia o latou ia e fesoasoani i le tausiga o le filemu. O le mea foi lea e ala ai ona taua le fonu a nuu, aua o latou ia latou te taua le filemu. E i ai sala ogaoga. A iai solitulafono ogaoga ua manu le tulaga o le fonu tauati. A oo ina mama ni solitulafono ua fonu fale. E le malamalama la i ai le vaega lea e le o i nuu. Lau Afioga i le Fofoga Fetalai, o la e faafofoga mai o tatou nuu ma itumalo.

**Tofa Levaopolo Talatonu:** Lau Afioga i le Fofoga Fetalai. O le mea e fia faasao pe faamalamalama foi. Ou te manatua le taimi na fai ai le faamavaega a le Afioga i le sui usufono mo Palauli le Falefa i le Palemene. O upu ia na talanoa mai ai, faafetai ua ou faamavae o le a ou alu ai i fonu a le matou nuu. O lona uiga e le i le va nei ona afio le sui usufono mo Palauli le Falefa i le latou nuu i fonotaga. O le sao lea.

**Afioga Hon FAUMUINA TIATIA FAAOLATANE LIUGA:** E le sao. O le mea e le sao ai, o le sui usufono lea mo Saleaula, na saunoa fai mai o le ava la e i gatai o le latou nuu, ae e leai se ava o i ai. O lona uiga e le i alu lava lea sui i le latou nuu. O le ava e i gatai o Fagamalo ma le alu atu i Lelepa. Se i vaai i ai i le sese o le mea lea e i ai? O le tele o taimi e te faamaumau ona o lou alofa i lou itumalo ma afioaga ma alaafaga. O taeao foi le isi fonu. Ou fai atu i le nuu, 'ou te le alu atu pe a oo le fonu a le Palemene taeao i le Aso Faraile.' Ae a le oo le fonu, ou te oo atu e fesoasoani i le faamalamalama o nisi o atinae aua le tofa ma le faautaga o si o matou nuu.

Lau Afioga i le Fofoga Fetalai, ou te lagolagoina le Tulafono. Pau lava nai suiga ia, ina ia faapena ona... Pau lava lau fesili, e i ai matai e leai ni saofai na faia i totonu o latou nuu. E agavaa la le matai e le i asua le ava i totonu o nuu? Pe na o le matai na fai i totonu i se mea i inei i le taulaga? O lau fesili lea. A faapea la e nofo le matai lena i totonu i i, se matai na inu sana ava i le nuu? E talia e le nuu pe a alu atu i ai? O le fesili lona lua, o la e faafogafoga mai tagata palota o le matou itumalo na o atu i ai sui tauva o Nofoa ia Tu Taulaga. Ua fai i ai, ua outou le toe agavaa tou te palota i Savaii pe tou te palota i tua, ua sui le Tulafono, o outou uma ua omai i le matou lola. O lona lua lau Afioga, ua i ai le aufaigaluega a le Malo.....

**Afioga Maualaivao Pat Ah Him:** Lau Afioga i le Fofoga Fetalai....

**FOFOGA FETALAI:** Malie lava lau Afioga, ona o lea sa taua sui Tu Taulaga, o latou o lo o aafia. Tulai mai lau Afioga. O fai se tulaga faapena lau Afioga?

**Afioga Maualaivao Pat Ah Him:** O se mea e fia faamalamalama.

Faafetai lava mo le avanoa i lau Afioga i le Fofoga Fetalai. O le taua ia o le mataupu o lo o saunoa i ai le sui usufono mamalu, ma e tele foi ana fesili e taligofie. Ae o le mea ua ou tulai atu ai ma le faaaloalo, o le mea lea o sui po o komiti a sui tauva o nuu Tu Taulaga. Ona o lea e faalautele mai e le iloa po o... Ae o le taimi tonu lava lena, o lea ou te i ai foi i totonu, e fai ai au ma sui o tagata, o le aafia o i totonu o le Taulaga. I lau saunoaga i le upu lea faapea o le faasese, e leai.

O le mea taua ou te agai i tagata, pe ou te manao e tau i tagata, o le aiatatau. E lua au aiatatau. E filifili oe i se sui e talafeagai, silasila tataui i ai outou, e fai i ai lau ekisi. A o le palota, e tasi lau ekisim ae i le taimi nei, ua mafai ona e resitala i itumalo o Nu'u Tu Taulaga, pe e te tumau ai pea i le palota lea sa e resitala ai. O le agaga tonu lava lena o lea e i ai. Ae e le faapea ua le agavaa. E agavaa lava latou i le latou filifiliga saoloto i le latou aia e lua lea e i ai, o lea e faataga mai e le Tulafono. O le faafogafoga mai lea o itumalo ma Nu'u Tu Taulaga, i le faamatalaga lea e fai, e taua le tou malamalama. Ne i te i ua avasese, po o ai foi nisi komiti po o nisi sui po o nisi Komiti o latou faia lea uiga ia e le talafeagai. E le talafeagai tau le mea sao ma momoli lelei le Tulafono ma le feau e tataui ona i ai ma le faaaloalo lava i lau Afioga.

**FOFOGA FETALAI:** Malo, malo faafeai mo le faamalamalama a le sui usufono. E manatu foi e taua le finagalo o le sui usufono o Paluli le Falefa. O sui usufono uma a mai Salafai o lo o i ai ia o latou tagata palota o lo o salalau i Upolu nei. E le gata foi i lea o sui usufono ma itumalo mamao i tua o lo o i ai o latou tagata i le taulaga i Apia. A o lea ua saunoa manino faafetai atu i le

se tasi o sui usufono mo Palota Taitoatasi, Afioga Maualaivao Pat Ah Him, leaga o le talaiga lena lea e alu. Ua le o toe i ai se agavaa o tagata o lo o nonofo i fanua tumaoti i le taulaga. A o lea ua faamalamalama manino e lua avanoa, e fai pea lau aiatatau e te palota ai i lou nuu po o le mea o lo o ua e alala ai. Sei tulai mai le sui usufono o lea ua manino.

Malie se i tuu atu le avanoa i le sui usufono mo Siumu, tulai mai le sui usufono mamalu m Siumu.

**Tofa Hon Tuuu Anasii Leota:** Lau Afioga i le Fofoga Fetalai o le mea e fia faasao. O le mea e fia faasao e saolelei le saunoaga a le sui usufono mamalu o lo o saunoa nei. O le talaiga lea o lea o lo o tupu nei leaga o le mea lea o lo o tupu foi i au tagata palota i Apia. O le talaiga la e alu ua tou le toe agavaa tou te palota i le Lola la e tou te i ai nei. O lea faafofoga mai ia le mamalu o Samoa aemaise o le aupalota e le o sao le mea lea. O lea la ua manino ina ia manino ai foi i Komiti lea e o ma fai le talaiga lea. E taufaasese, e matua sese tele lea mau ua aveatu i tagata ua le mafai ona toe palota i le Lola sa palota ai. A o lea la e faafofoga mai ia o lena ua manino, nofo pea oe i le Lola lena. Afai o le Lola a Siumu nofonofo ai pea oe i ina, ma le faaaloalo.

**FOFOGA FETALAI:** Ia o lea ua agiga i le Maota le saunoaga a se tasi o sui usufono mo Palota Taitoatasi, Afioga Maualaivao Pat Ah Him, leaga o lea sa i ai le tuuaiga lea sa saunoa ai le sui usufono mo Palauli le Falefa. O lea foi ua faamanino e le sui usufono mo Palota Taitoatasi, Afioga Maualaivao, atonu o nisi tagata ma nisi Komiti. Ae faafetai i se tasi o sui usufono mo Palota Taitoatasi, Afioga Maualaivao Pat Ah Him o lea ua e saunoa manino o lea foi ua e folasia ia te oe ma lau foi taumafaiga i tulaga o lau Komiti e le o i ai se mea faapena o tupu. Ae o le a tatou o ai faapea o lea e faafofoga mai le tatou atunuu, e lua vaega o le aiatatau e te agai i ai.

Se i tulai le sui usufono mo Faleata Sisifo.

**Tofa Lealailepule Rimoni Aiafi:** Lau Afioga ou te molimau atu o le Komiti a le sui usufono mo Palota Taitoatasi, Afioga Maualaivao, ma le faaaloalo lava.

**Afioga Maualaivao Pat Ah Him:** Lau Afioga i le Fofoga Fetalai e maua se avanoa? O le sui usufono la lea o Faleata Sisifo lea ua manino nei la o lo o faia le mea lea. Ou te tatalo atu aua e te soso mai i le papau soso atu i tua i le loloto e te malemo ai. Lau Afioga o le agaga lena aua a e soso mai i le papau ua e pa'ulia, tusa ua e le mautinoa le mea o lo o e tu ai nei. Lau Afioga i le Fofoga Fetalai, e saolelei lava e taua ia o le mataupu lea a na faapea e le tele le itumalo ua tolusefulu ma ona tupu nuu ou te alu a e fai le galuega. Ae le mafai e matua faigata lava. Ou te manao e ave sao le gagana i le faamalamalamaina pei ona ou faamalamalamaina atu i lau Afioga i le Fofoga Fetalai. E le faapena le manatu, ma le faaaloalo faafetai.

**FOFOGA FETALAI:** Malie lau Afioga i le sui usufono, se i avatu lava le avanoa i le Tamaitai Minisita.

**Afioga Hon Fiafame Naomi Mataafa:** Lau Afioga i le Fofoga Fetalai o se mea e fia faamalamalama i le saunoaga a le sui usufono o lo o saunoa nei. I le



tulaga lea i le mataupu ua siisii ai nei le maota i talaiga eseese ua fai. O lau talosaga lau Afioga i le Fofoga Fetalai o lea e manino le tatou Tulafono i agavaa o tagata palota ma le mea e mafai ona oo i ai le latou filifiliga. A tatou o loa i le mea o le tatou felauai i faamatalaga a tatou Komiti ma talaiga faapena ia ou te fai atu le tala a le sui usufono mo Faleata Sisifo lea na saunoa ai i le sui usufono tamaitai mo Gagaifomauga Nu. 1. Welcome to polictics. O le natura a lena o tatou a o le Tulafono a ia la e alu sao a le Tulafono ia o lo o fofola mai ai agavaa o tagata e fai ai latou talosaga. O lea la ou te talosaga atu aua tatou te o i le itu lea, o le tatou see ese ma le Tulafono pei o le a tupu ai se mea i totonu o le tatou maota fonu a o lea a e manino tatou Tulafono, ma lou faaaloalo.

**FOFOGA FETALAI:** Tulai mai le sui usufono mamalu e faaauau le saunoaga.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, faafetai atu i sui usufono ua sausaunoa ma faauilavea. O la e faafofoga mai ia nai toeaia ia sa faalogo i le leo o le sui usufono mo Palota Taitoatasi, Afioga Maualaivao po o le leo a lea na outou faalogo i ai i le faatonuina o outou. Ia faamagalalo i ai, ae aua tou te palota fua iinei i le taulaga ae palota i tatou itumalo tatou o e atinae ia Savaii.

O le i si mea lau Afioga i le Fofoga Fetalai se o mea nei o tagata faigaluega a le Malo lea ua tautau e o i le Palota. O la i ai le Tulafono a o lau talosaga leaga ua faaoga ia o latou tofiga i le Malo e fai ai a latou feuaiga ma ua aafia ai i si tagata faigaluega e i lalo ifo o latou. Ua latou faaaogaina taavale e feoai ai. Ou te tatalo atu i le Kapeneta ma le Malo faa-ono masina e resign ai ona o lea i tua e fai a latou palota ia ma toe sue ai nisi a latou galuega, ma le faaaloalo manuia le tatou Fonu.

**FOFOGA FETALAI:** Malo.

**Susuga Hon Tuilaepa Fatialofa Lupesoliai Neioti Aiono Sailele Malielegaoi:** Lau Afioga i le Fofoga Fetalai.

**FOFOGA FETALAI:** Se i tulai mai lau Afioga i le Palemia.

**Susuga Hon Tuilaepa Fatialofa Lupesoliai Neioti Aiono Sailele Malielegaoi:** Lau Afioga i le Fofoga Fetalai e aafia uma ai a tatou uma i le Tulafono lea mai le taimi e aliali ai loa ia sui faatutu. Na o le pau a i latou e faaauauina le Malo na o le Kapeneta. O latou la na e feoai i taavale, ae le fetai foi le o le Kapeneta faaoga taavale i tulaga o campaign faa-Palota. O lea la ou te faasilasila atu e le gata ia i latou uma a o le aufaigaluega a le Malo ae aafia uma ai a ma i tatou i le Maota nei o lo o faaogaina taavale.

**FOFOGA FETALAI:** Tulai mai se tasi o sui usufono mamalu mo Falealili, Tofa Tusa Misi Tupuola.

**Tofa TUSA MISI TUPUOLA (Falealili):** Lau Afioga i le Fofoga Fetalai faafetai tele mo le avanoa o lenei itumalo. Ou te tulai atu foi e fia fai se sao e tusa o le Teuteuga o le Tulafono o Faiga Palota. Lau Afioga ma le faaaloalo e

i ai lava upu e masani ai le atunuu. O Samoa o le atunuu tofi e le se atunuu taliola. O lona uiga o se manatu e tofu a le nuu ma tu ma a na aganuu, ma itumalo e le tutusa uma afioaga i totonu o le atunuu. O lea ua umi lenei taeao o tatou talanoaina pea le monotaga faale-nuu ma le tautua faale-nuu. Ae aua nei galo la e faafofoga mai le atunuu i lou lea manatu e tofu a le nuu ma a na aganuu e le tutusa uma. Na manatu lea o le sui usufono o lenei itumalo ou te le toe talanoa i se monotaga po o se tautua. Ua manino lelei i le faafofoga mai a tamalii ma failauga o nuu taitasi masalo e sili atu le latou faauigaina, tulou lava le Palemene, aua e fua lava i tu ma aga a lea nuu ma lea nuu. O lou lea manatu o Samoa ia e tala lasi, e tofu lava le nuu ma lana ia faauigaina e tusa ma lenei mataupu.

Ou te momoli atu le faafetai tele i le Afioga i le Tamaitai Minisita e tusa ai ma lenei Teuteuga faanatinati ua tatou toe talanoaina i lenei aso. E faafetai foi i le Afioga i le Loia Sili lea foi pei ona malie ai le saunoaga a se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow pei sa tau te i foi se manatu i le taeao ona o le saunoaga a se tasi o sui usufono e uiga i le Loia Sili ma ana galuega ma ana feau. Ia ona o le Loia Sili lau Afioga ma le mamalu o le Palemene o le tamalii o lenei itumalo, ia sa lagona a le faanoanoa ae ua leai se tala e faiatu ona ua le maua atu se avanoa. Ae ou te manatu o ia saunoaga ma lafoga i le taeao. Ou te manatu leaga o au ou te fai tamalii, ou te manatu lau Afioga ina ia aveese upu ia mai totonu o faamaumauga a le Palemene ona e le faapea e faaituau ia le Afioga i le Loia Sili a le tatou Malo. O le uiga lea o se manatu ou te lagolagosua ai le faatu atu o le lafo a le sui usufono mo Faasaleleaga Nu.1 ona o le tau ai fua o le suafa o le Afioga ia Tuatagaloa o le tamalii o lenei itumalo, ma le faaloalo.

**FOFOGA FETALAI:** Malie lava le sui usufono, se i tuu atu le avanoa i le faauilavea a le Itu Agai.

**Afioga Hon Palusalua Faapo II:** Lau Afioga ou te faamalulu atu i le sui usufono mamalu aemaise foi le faafogafoga mai a le Loia Sili. Ou te manatu o le tali a le sui usufono o lenei itu e tusa ai o le mataupu na laga e le Afioga i le Minisita, lea na aveatu ai lana ia tali e faamalamalama ai foi lona ia tulaga. Ae ou te faamalulu atu i lau Afioga i le sui usufono mamalu ia e leai o aga a ia o tatou felafolafoaiga aemaise e le tuua i lalo le Afioga i le alii Loia, se tasi o sui usufono mo Vaimauga Sisifo, Tofa Lefau Harry Schuster. O lea foi e fia tali atu ia e tusa ai, ma e leai se tala sese a le sui usufono mo Vaimauga Sisifo, Tofa Lefau na faia i le laua va faa-Loia ma le Loia Sili.

**FOFOGA FETALAI:** Ia o lea ua maua le finagalo o le Taitai o le Itu Agai. Ou te manatu o le mataupu lea o le a taatia mai i le Fofoga Fetalai. O lea ua ou tapa i le taimi nei ia le Hansard o le saunoaga a se tasi o sui usufono mo Palota Taitoatasi, Tofa Lefau Harry Schuster ona fai ai lea o lau faaiuga. O lea lava ou te matau totoa i le taeao analeila ina ne i meaane e i ai se isi mea e le i maua i lau faalogo, o le ala foi lea o lou le fai atu i le taimi ua sola. Ae ona o lea ua toalua sui usufono o le Maota ua tapa, o lea ua ou tapa ina ia aumai Faamaumauga o le mea na saunoa i ai se tasi o sui usufono mo Vaimauga Sisifo, Tofa Lefau na aafia ai le Loia Sili. A faapea o se mea e aafia ai tatou Tulafono Tumau e faapena ona fai. Ae malilie sui usufono ne i te i foi ua toe tulai ae se isi saunoa i le tulaga lea ae taatia mai o lea ua ou tapa

Faamaumauga ou te faitau ai ona avatu lea o le faaiuga. Tulai mai le sui usufono mo Falealili.

**Tofa TUSA MISI TUPUOLA:** Faafetai i lau Afioga mo le saunoaga ua malie foi lenei tootoo. Lau Afioga o le Tulafono Tau Faaofi lenei tatou te toe teuteuina nei o le Tulafono Tau Faaofi o le 1963. Ua 52 tausaga o le Tulafono, mai lena taimi seia oo mai i le aso ua tele ni suiga fou ua tataua ona tatou vaavaai i ai. Mafua i se a? Leaga ua tele suiga, lea foi ua tupu le atunuu ua malamalama ma atamamai Samoa ua tele foi suiga fou ua oo mai pei ona vevesi ai nei le Palemene i lenei taeao. Ia ona manatu lea lau Afioga, o le tulaga i Teuteuga ia ua aumai nei pei ona aumai i le Tulafono toe Teuteu lea o le 2015. O lea ua uma ona tuu atu se manatu o lenei itumalo e lagolagoina tele lenei Tulafono toe Teuteu. Na o le pau ia o manatu o le itumalo, ou te manatu foi ua vela le fala i lenei aso ma tulaga o le tatou toe Teuteuga. Ia a o nai manatu na e fesoasoani e taoso ai pea agavaa taua o sui usufono e fia o i le Palota aua foi ia manuia o le tatou atunuu e ala i le maota lenei o le Palemene. Ia manuia tele le tatou Fono.

**FOFOGA FETALAI:** Malo faafetai i le saunoa i le sui usufono mamalu. Ia tulai mai le sui usufono mo Gagaemauga Nu.2 ona sosoo ai lea ma le sui usufono mo Vaisigano Nu.2.

**Tofa LEVAOPOLO TALATONU:** Lau Afioga i le Fofoga Fetalai faafetai ua maua se matou avanoa. Ou te manatu foi o lea ua tele foi nai lagona vaivai sa i ai, a o lea ua maea foi ona sausaunoa ai le tele o sui usufono. E leai la se manatu ou te toe asa lea ogasami. Na o le pau a lea o si vaega lau Afioga i le Fofoga Fetalai ma le mamalu o le maota, ona o lea e talanoa lava le Tulafono i le tulaga o le faamalosiā o auaunaga po o services ia i totonu o tatou nuu ma alalafaga. E i ai a le manatu lau Afioga i le Fofoga Fetalai o le Tulafono ma le Teuteuga lenei e soli faavae. E Unconstitutional Amendments mea ia na aumai. E lua vaega e aveatu ai se lagona.

O le mea muamua, pei foi lava ona luga, lalo le tatou Maota i tulaga o Nofoa ia e lua ia ma tatou Nofoa. O lona uiga la e le o laugatasia po o tutusa ia tagata uma i lalo o le Tulafono.

O le lona lua o vaega ia pei ona ou taua o lo o afaina ai ma oia ai le tatou Faavae o le tulaga lea o le faamalosiā o auaunaga ia, le service lea po o le tautua lea i nuu. O le a ou faitauina atu lau Afioga i le Fofoga Fetalai le vaega 8 o le Tulafono Faavae.

**“8. Faasaolotoina mai le faamalosiina e faigaluega-(1)** E leai se tagata o le a manaomia ina ia faamalosiā po o le uunaiina ia faigaluega.

(o) So o se galuega po o se tautua ua manaomia e le aganuu faa-Samoa po o lea tautua e avea o se vaega o itu e masani ai i mea tau le nuu.”

E manino lava.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga i le Fofoga Fetalai, e pei o le mamao o Sasae mai Sisifo, e faapena foi le mamao o le Faavae ma le Tulafono ma le mea lea e taumafai mai i ai le sui usufono. Ia manatua lelei e le Maota, so o se Tulafono e aumai i totonu o le Maota, o le mea lea e siaki muamua pe i ai se iota o le Faavae o afaina, e le o ogatasi ma le Tulafono. Aua e le ogatasi loa ma le

Tulafono Faavae, ona le tatau lea ona aumaia. Ae afai lava o se Tulafono e tatau ona fai, ua tatau loa ona teuteu le Faavae i le vaega o lo o aafia ai. O le Faavae la lea na teuteu, lea ua matalatala ai le vaega lea, lea na outou tetee i ai, le vaega tonu lava lea sa aumai e faasino i le mafai ona faatu o Nofoa Tu Taulaga, lea sa outou ioeina le Lipoti lea na aumai e pasia ai. Ae oo ane i le taimi e pasia ai loa le Faavae e taga ai mea ia, ae outou tutu mai lava i luga outou tetee, vagana la le Afioga i le sui usufono mo Faleata Sisifo. O lona uiga, e na o le sui usufono mo Faleata Sisifo lava na te silafia le taua o le Teuteuga o le Faavae ma le Tulafono lea ua pasia. O le ala foi la lena e le o tautala lava le sui usufono mo Faleata Sisifo i se tulaga e soli Faavae, aua foi o la e ua uma ona silafia e le sui usufono mo Faleata Sisifo, ua uma ona Teuteu le Faavae ia taga ai mea ia. Ae o le a e lailoa lava i le toe laulau mai o le Faavae, e aliali ai lou le faitauina o le Tulafono Tau Faaofi ma e malamalama i ai.

Lau Afioga i le Fofoga Fetalai, e pei o ituaiga lauga ia o lea e umi ai le tatou Fono, o le tau soo mai o le soli Faavae, ua leai ni soli Faavae o toe i ai, ua uma ona teuteu le Faavae.

**Afioga Hon Palusalue Faapo II:** Lau Afioga i le Fofoga Fetalai o se mea e fia faasao. O lea ua saunoa soo lava ua faatele ona saunoa le Palemia na matou tetee i ai. Na ala ona matou tetee i ai, ona ua aumai faatasi uma mea nei ua le mafai ona maioio ai le tulaga o le tatau ona matou tetee ma le matou talia. O lau strategy lena na fai. Ae ana aumai auauai lelei, ia....

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga i le Fofoga Fetalai, a lea sa aumai auauai?

**Afioga Hon Palusalue Faapo II:** E le i aumai auauaia.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Na aumai auauai. Ia se i vaai o lena foi ua e le manatua mea na aumai auauai?

**Tofa LEVAOPOLO TALATONU:** Lau Afioga i le Fofoga Fetalai, ua... o le Teuteuga la lea e sui ai le Faavae lea....

**FOFOGA FETALAI:** Malie le sui usufono, se i avatu le faamalamalama i le faanunumi lea.

Tulai mai le Minisita mo Faatoaga ma le Faleoloa o Faatoaga.

**Afioga Hon Le Mamea Lemalu Su'a Leatuavao Tuiletufuga Ropati Mualia:** Lau Afioga i le Fofoga Fetalai, e faamalulu atu i le sui usufono mamalu, na ona fia faamanatu atu lava le mea lea, o le monotaga foi lea a tatou e fai i nuu, e compulsory, lona uiga e faamalasia e nuu. A fai saogatupe a le nuu ae tapa le tai \$10, e tai \$10 uma lava matai la e fai a latou monotaga. A faapea la e fai se saofaga a le nuu ae le faia se monotaga a se matai ae le totogia mai le \$10 lea, e toe faasala. E faasala, e toe double up pe toe faatele atu. E alu alu lava faapea e leai, faapea loa, ia, faasala la i le puua le tulafale lea. Tailo i tou nuu, a o le matou faa-Samoa lena i matou nuu, e compulsory, faamalasia le monotaga, faamalasia. O le mea la lena e eseese ai mea

faalelotu, eseese ai mea o le tautua faalelotu, lea e fai matafale foi nei e fai taulaga ma mea na, e compulsory. A leai lava sau taulaga, leai se alofa i le faifeau, e le faasalaina oe. Ae a oo mai loa i mea faamatai a le nuu ae le faia lau monotaga, e faasala oe. E compulsory. Ia na ona faamalamalama atu faapena, leaga ua fai sina ou matua ua fia selau tausaga o ou matai o la e ou te iloa mea i totonu o nuu. Na ona ou fesoasoani atu faapena. Faafetai.

Ma le faaaloalo lava.

**FOFOGA FETALAI:** Malo. Malie, se i avatu le avanoa, se i maea atu lava le tali a le Malo ona avatu lea o le avanoa.

Tulai mai lau Afioga i le Minisita mo Galuega tau Alamanuia ma Atinae a le Malo.

**Afioga Hon Lautafi Fio Selafi Purcell (Minisita mo Galuega tau Alamanuia ma Atinae a le Malo):** Faafetai i lau Afioga i le Fofoga Fetalai. Ua ou tulai atu i lenei itula o le aso, muamua lava ona momoli atu le faamalulu i puega i si ou itumalo ona ua... pe ua faafa ea ona taua le suafa paia o Satupaitea i lauga a sui usufono mamalu. O lea la, pei o le Palemia sa muamua taua suafa o si ou itumalo. E faamalulu atu, a o lea la ua ou iloa le mea na ala ai ona taua, aua o lea ua ta'u Satupaitea, tau ai lea o Lepā. Na pau lava lea o pitonuu e lua o Samoa o lo o lelei pulega o nuu, o lo o mamalu le faiga o mea nei o monotaga, o lo o maioio lava mea nei o monotaga ma tautua faalatele. Atonu o le mea lena sa taua ai e le Afioga i le Palemia le mamalu o le tatou nuu Satupaitea, ne i te i ua outou pea mai ua faatasina le suafa mamalu o le tatou itumalo.

Ae ua ou fia pai atu lava i le saunoaga a le sui usufono mamalu mo Saleaula, lea e faapea e soli Faavae le Tulafono Tau Faaofi. O lea la ou te tilotilo atu i le Faavae lea e faapea mai, "Freedom from forced labour." E manino lava. "(1). No person shall be required to perform forced or compulsory labour. Ona tilotilo ane lea i le "(2) For the purpose of this Article, the term "forced or compulsory labour" shall not include – (d) Any work of service which is required by Samoan custom or which forms part of normal civic obligations." O lea la ua manino i i, e le aafia mea ia i lalo o le force labour i lalo o le tatou Faavae Autu. Na ona faamanino atu lava ona atonu e ese le faa-Samoa la e talanoa mai ai le sui usufono mamalu, ae o lou lena malamalama i le Tulafono Tau Faaofi. Ma le Faavae.

Ma lou faaaloalo lava.

**FOFOGA FETALAI:** Malie le sui usufono mo Saleaula, se i avatu le avanoa i le sui usufono mo Faleata Sisifo.

**Tofa Lealailepule Rimoni Aiafi:** Faafetai lava i lau Afioga. Lau Afioga, e fia fesoasoani atu i le tama matua le Afioga i le Minisita mo Faatoaga ma Faleoloa o Faatoaga, aua tasi la lea nuu o lea e soli Faavae.

Lau Afioga, e pei o le mea lea na laga atu e lenei Itu, ia tatou faitau manino lava i le tatou Tulafono Tau Faaofi. O lea e sao lau Afioga, afai e te saunoa faamallosia, o mea faale-Lotu, e le faamallosia, e pule oe. O lea ua tamau mai i le Tulafono Tau Faaofi lenei lau Afioga, e faamallosia e le gata o le faale-Aganuu, faale-Lotu ma isi mea uma faapena. O le mea la lena e tataua ona tagai i ai lau Afioga ma tatou ina ia tatou malamalama lelei i le Tulafono, ma

mea ia ua noatia e le Tulafono. Ana faapea mai le Tulafono, monotaga, mea faale-Aganuu, uma, lelei. A o lea la ua lavea ai i totonu ma mea faalelotu. O le mea lea na ou fesili ai lau Afioga, a le faia la sau monotaga ae fai au mea faalelotu, e agavaa ou te alu? O lea e le i aumaia se tali manino, a o lea ua faamalosia mai i le Tulafono Tau Faaofi.

Ma lou faaaloalo lava.

**FOFOGA FETALAI:** O lea ua maua le finagalo o le sui usufono. O lea la ua.....

**Afioga Hon Le Mamea Lemalu Su'a Leatuavao Tuiletufuga Ropati Mualia:** Se i ou fesoasoani atu lava lau Afioga faamolemole. Lau Afioga i le sui usufono sinia o lena Itu, a silasila i le Tuilafono Tau Faaofi lena i le mea e eseese ai le monotaga, aua o lena e fai mai le mea lena e i totonu o le Tulafono Tau Faaofi, o le monotaga, o le tautua. Ae pau lava lea o le mea e compulsory, o le monotaga. A lena e tusi i ina, silasila i le definition o le monotaga, o le monotaga, o le tautua compulsory. E sao? Ia, o lena, o lena tonu lava. Faafetai.

**FOFOGA FETALAI:** Se i avatu lava le avanoa i le Minisita mo Fesoootaiga ma Faamatalaga Tekonolosi.

**Afioga Hon Tuisugaletaua Sofara Aveau:** Lau Afioga i le Fofoga Fetalai, e fia faalautele atu le saunoaga a le Afioga i le Minisita, ona o lea sa saunoa mai le faauilavea a le Afioga i le sui usufono mo Faleata Sisifo, lona uiga e alu faatasi mea faale-Aganuu ma le faale-Lotu. A e tagai i le Tulafono Tau Faaofi, faale-Aganuu po o le faale-Lotu. O le Tulafono Tau Faaofi lena.

**Afioga Hon Palusalua Faapo II:** Lau Afioga i le Fofoga Fetalai, ou te fia fesili atu lava i le sui usufono mo Faleata Sisifo, o lona uiga o lou malamalama lea e i ai le sui usufono mo Faleata Sisifo o le a faatulafonoina ma mea faale-Lotu e tusa ai ma le Tulafono Tau Faaofi lea? O le mea lena ona o la e faalogologo mai le atunuu, e le gata ina compulsory le monotaga, ae faapena foi ma mea faale-Lotu. O le mea lena o lea ou te fia fesili ai.

**FOFOGA FETALAI:** O lea ua maua le fesili, ou te le fia tuu atu se avanoa e tali ai lena fesili. Malie le sui usufono mo Faleata Sisifo, e ese lava le ogasami lea o le a lua tosoa i ai le tatou mataupu. E le aoaia atu iinei tu ma aganuu a nuu. O le tulaga aloaia i le Tulafono lea e tau fai. O Tulafono lava a le Malo, o Tulafono e agatonu i ai le taumafaiga o Tulafono.

Le sui usufono mo Saleaula, tulai mai e faaii mai le saunoaga.

**Tofa LEVAOPOLO TALATONU:** Faafetai. E pei o le tulaga lena sa ou tilotilo atu ai au ia i le Teuteuga o le Tulafono Tau Faaofi, ona o lea ua faamatala mai le monotaga, o le compulsory service po o le tautua e faamalosia. A o lea e manino lava le tatou Faavae pei ona ou fai atu i le Vaega 8, e le o faamalosia e le Tulafono. O isi Teuteuga ia na fai, e ese Teuteuga na ese le mea lea ou te talanoa atu ai. O au ua ou matua ofo e toasefululua le tou Kapeneta ae le o maua e se isi o outou le mea lea e sese mai totonu o le mea lea. Ua matuai ou ofo lava. A o outou foi, a o Minisita

Lagolago se i fai se latou... po o a latou mea la e fai. A o lea e tele le faaletonu o le mea lenei. O le mea lena e le lagolagoina ai e lou sui usufono le tulaga lea o le Teuteuga lenei, ona o lea e i ai le faaletonu tele lea. Faafetai ua uma foi le avanoa.

**FOFOGA FETALAI:** Ia o le a avatu le avanoa leaga o lea ua e taua le Kapeneta ma Minisita Lagolago.

**Afioga Hon Tuisugaletaua Sofara Aveau:** Lau Afioga i le Fofoga Fetalai, na ona faasao atu, e sese le Tulafono la e fai mai ai le sui usufono, o lea ua uma ona faitau atu le avanoa o le Tulafono lea e agai i ai le Teuteuga, ae sese mamao lana Tulafono lea e tau mai.

**FOFOGA FETALAI:** Ia, malilie ia lena itu o le Maota ma Minisita Lagolago, e faapea lava lauga a le sui usufono mo Gagaemauga Nu. 2 e faapea lava i isi taimi. Ae o lea ua faaiu mai lana saunoaga, le sui usufono mo Vaisigano Nu.2, ona faasolo ane ai lea i se tasi o sui usufono mo Salega, Afioga Afualo Wood Uti Salele ma le sui usufono mo Faasaleleaga Nu.2.

**Tofa MOTUOPUAA UIFAGASA AISOLI VAAI (Vaisigano Nu.2):** Faafetai i lau Afioga i le Fofoga Fetalai mo le avanoa. Ia, ona ua matau atu ua puupuu foi le taimi, o le a faapuupuu atu foi se manatu i lenei taeao, ona o le Tulafono Tau Faaofi ua i lumamea nei mo lona toe Teuteuga. Ia te au lava ia, meaane le paia o le Maota, o au ou te le... i lou lava manatu, ua ala ona vevesi nei mea ona ua aumai nei definition po o uiga o upu nei, monotaga, tautua. A silasial foi i le tele o nuu, o mea nei o le monotaga, e pei o le matou nuu, a fai le fonu, e \$5 a le matai o lana monotaga, pe faatasi i le tolu masina. Ae a faatino le tautua a le tagata e le o nofo i totonu o le nuu, e ova i le fia selau. I lou la manatu, ua tali tutusa uma lava nei upu o le monotaga ma le tautua. Ae ua sili atu le aoga o le upu tautua i lo le monotaga la e fai i totonu o nuu. Ia, o le a ou le toe oo tele i lea mataupu.

A o sou manatu i lea Tulafono Tau Faaofi, o au e tau laalaa i luma lou manatu agai i le lumanai i le Tulafono Tau Faaofi lenei. Silasila foi, o tatou lea ua tatou Temokarasi, ua faaoga le tatou human right po o le aiatatau. Sa ou lauga ai foi muamua i le Tulafono Tau Faaofi lenei i le faatoa aumaiga, ona o tatou lea ua tatou o i ala faatemokarasi, ua alu agai luma le lalolagi. Tatou te le toe apaapa foi la i tua i le tele o nei mau gaogaosa. Afai ua faamatai oe e lou aiga, ia te au lava ia, ua i ai le talitonuga o lou aiga ia te oe, ua lelei lau tautua, po o le a avea foi oe ma tagata e tautua lelei i totonu o le nuu ma le aiga. E te le tau tapa la i tua i nei mea o tautua ma monotaga ma nei mau mea. Afai lava ua avea oe ma matai o le aiga, o le talitonuga foi lena o le sao o le aiga ma suli o le aiga, o oe o se tagata o le a faia le tautua. E pei lava o se tasi upu, ua tele lava le suiga o Samoa i lenei vaitaimi. O lea ua tatou i le seneturi fou, ua suisui foi faiga ae tumau lava le Faavae. Afai o oe ua e matai, o oe lena o lou agavaa lena. Po o le a lau tautua e fai, a tilotilo mai le sao o le aiga ma suli o le aiga ua le lelei lau tautua, e mafai lava ona toe aveese lou matai. Ia te au lava la ia, afai ua e matai, tuu ia nei mea o monotaga ma tautua, se i silasila lava le matai ma le sao o lou aiga, afai e te le tautua lelei, a e alu atu e te fia alu i le palota, e fai mai le matai, 'oi a e sau i

inei e leai sau tautua o faia?" O matai, o le aiga, o latou na latou te faamasinoina oe pe e te agavaa e te alu i le Faiga Palota.

E pei la o sou manatu lena o lea e laalaa i luma Samoa, ua tatau foi ona... o lea e alu i luma le faatemokarasi, ua tatau foi ona alualu i luma ma le tatou aganuu. Afai la ua tau saosaoa i luma le temokarasi, ia aapa mai i tua i le tatou aganuu e tosotoso atu ia laugatusa faatasi, pei e i ai la le qualification lea, a e le matai, e le mafai la ona e sau i totonu o le palota. A o le papuipuia o matai e fia omai i totonu, o lou manatu, ua tatau ona tuutuuese, faitalia lava le aiga ia ma le matai pe faapefea ona fai le latou sui lea e fia alu i le palota.

E pei la o lau faamatalaga lea i lenei taeao. O le mea lenei ua tele ai le lavelave, o le monotaga a e o lo o nonofo i totonu o fanua tumaoti i Faleata ma Vaimauga, o lea ua tatou taumafai e faasapasui solo nei mau mea, po o ai e agavaa a o ai e le agavaa, ona o Tulafono ia. Ia te au lava ia, o lou human right, o lou right e te alu ai i le palota, ua e matai. Aua o le mea lenei o le tautua, tatou te tautua uma lava i itumalo uma, a fai mai le faaulufalega a Faasaleleaga po o Aleipata, e te alu e ave i ai sau meaalofo ona o lau uo la e i ai. Tusa lava o lena ua e tautua i lena nuu ma lena... e pei o le mea lena foi lea ua fai atu ai se faamatalaga i lenei taeao. Na pau lena.

Ma lou faaaloalo tele lau Afioga i le Fofoga Fetalai. ‘

**FOFOGA FETALAI:** Malo faafetai. Se tasi o sui usufono mo Salega, Afioga Afualo Wood Utī Salele, tulai mai.

**Afioga AFUALO WOOD UTI SALELE (Salega):** Faafetai i lau Afioga i le Fofoga Fetalai. E le umi foi se manatu ona o lea ua tele ina lagalaga le tele o vaega foi sa tau avatu ai se manatu. A o nai vaega lava ia lau Afioga i le Minisita se i silasila ane i ai, ona o le faa-Samoa lena e i ai i ina, o le monotaga faapea foi le service, lena e i lalo o le vaega lena e i le parakalafa (‘in form of cash, kind or goods) ona sau loa lea o le faa-Samoa, tino i tupe, ae sau le faa-Samoa o le kind, o le ituaiga. Ou te masalo e le o le ituaiga le uiga o le kind lena e i ai faamolemole e silasila ane i ai, a o le agalelei. Ia, ne i te i ua pau i le... a o le agaga lava lena ona o mea na e agai i ai le uiga tonu o le auunaga lea po o le monotaga.

Lau Afioga i le Fofoga Fetalai o le teuteuina o le Tulafono e moni lava o lea ua lagalaga foi manatu e tusa lava o le faamoemoe. O lea o le a faaiuiu le Paeaiga ia a o lenei foi ua toe aumai suiga ae o mea lava e tatau ona fai pe afai o le agaga ina ia mautinoa ua tulai mai i le amiotonu tusa ai o le Tulafono lenei e faufau atu e le tatou Maota.

Ae ina ia mautinoa ua taunuu, o le upeti lava ia ua uma ona vane ma mamamu tusa ai foi o le Faavae o le atunuu e na o matai lava o latou ia o le a mafai ona tofia mai e ala i le filifiliga a le atunuu, ua mautinoa. Ia o lea ua tapena mai le Tulafono, ia o le ala i le pule o le tautua. O le faaeaina foi lea, e muliai le faaee o le suafa matai ia te oe a o le upeti lea ua uma ona taoto. O lea i ai i totonu le monotaga, i ai i totonu lau tautua. O le upu moni a, ia ua vaavaalua nei Tumua ma Pule ma le Afioga a le Atua, o lona uiga e le tusiesea ona o lea sa saunao ai foi se tasi o sui usufono ona o lena e i ai vaega na e i ina o lena e manino lava i le faaogaina o le “po o” ma le “ma.” Ae ou te masalo o lea e manino e le o faamalosiā mai, faafetai foi ona o lea e silasila i ai lau Afioga i le Tamaitai Minisita. O lea lava la e i ai le saolotoga ona o lea e i ai le “or” ia “po o”. O lona uiga e le o faamalosiā. O lona uiga afai o



lau tautua lea e afua i le monotaga po o le a lava. Po o le tautua faale-Aganuu ia po o le faa-Kerisiano. Ae le o taaofai atoa, o lona uiga o lea lava la e i ai le saolotoga. Ae o le taua o lea ua toe faamanatu mai ai e le Tulafono ia tatou ia le Faavae o le atunuu. O lea vaavaalua Tumua ma Pule ma le Afioga a le Atua. Ae o lo o ia tatou foi le faautautaga e mafai ai ona saili le tofa ina ia mautinoa po o fea o mea nei e lua lea agai ai lau tautua aua o le upeti lena lea ua mafai nei ona taofa i le Faavae. Na o ē lava ua faaee i ai le suafa matai e mafai ona tauva e ala i le filifiliga faatemokalasi ia o i latou na o le a mafai ona lautogia e fai foi ma Taitai o le atunuu. E le gata o le tausaga ae o le agai atu i le lumanai. Ia o sau fesoasoani atu lea lau Afioga i le Fofoga Fetalai, faamanuia le Atua i le tatou Fono.

**FOFOGA FETALAI:** Malo faafetai, e manatu o lea ua tatou tulalata i le tatou taimi malolo faatulagaina. Ae o lea e taatia i Maota le Faaiuga a le Fofoga Fetalai e ala i upu ia na i ai atugaluga o sui usufono mamalu, le sui usufono mo Faasaleleaga Nu.1 ma le sui usufono mo Falealili. Ua ou faitau ma ou matauina ai le tulaga sagatonu. E faamalulu atu ai foi i le matau a le Maota e le o i ai se aafiaga tele o le Afioga i le Loia Sili i le saunoaga a se tasi o sui usufono mo Vaimauga Sisifo, Tofa Lefau. O iu foi o le saunoaga lea e faamaualalo ai foi le sui usufono i le Loia Sili ona o nisi o tulaga na tulai mai. A o lea ua ou faitau manino lelei, o lo o sosolo pea i luga o lona finagalo na faaalua. E le i i ai foi se tulaga na ia taua ai se tau faatauvaaina o le saunoaga agai i le Loia Sili. Faafetai atu i sui usufono mamalu na lagalaga le mataupu. A o lea ua ou oo i le o'oo'oga ma le taunuuga o le folasaga sa saunoa ai le sui usufono ma ou te manatu o lea e sagatonu le lauga. Pau lava ia o upu na ou manao e aveese ona o upu e faifai i luga o le Tulafono. O le Tulafono mataivi. O upu na e le talafeagai lea ua ou faatonuina e aveese. Ae o tulaga o lo o aafia ai le Loia Sili ia e faamalulu atu i le sui usufono mo Falealili ma le sui usufono mo Faasaleleaga Nu.1. O lea ua ou matau o lea foi ua tatou oo i suesuega talafeagai ai ma o lo o sagatonu. O le faaiuga o le saunoaga a le sui usufono o Vaimauga Sisifo po o le a lava le mea na oo i ai lana tautalaga a o lea sa faamaualalo. Ia ona manatu lea ua taatia i le agatonu lea mataupu, tapa lau Afioga i le Palemia mo le tatou lafo.

*“(Upu na faatonuina e le Fofoga Fetalai e aveese mai Faamauga o le Saunoaga a se tasi o sui usufono mo Vaimauga Sisifo, Tofa Lefau Harry Schuster.....Ua ivi le mata o le Tulafono).”*

## **LAFO MO LE FAATAATIAESE O TULAFONO TUMAU**

**Susuga Hon Tuilaepa Fatialofa Lupesoliai Neioti Aiono Sailele Malielegaoui:** Lau Afioga i le Fofoga Fetalai ou te tulai atu ma le faaloalo e faatu le lafo, *Ina ia faataatiaese le tatou Tulafono Tumau 31(1) e avanoa ai suiga o le Tulafono mo le asō mai le 9:00 i le taeao i le 1:00 i le aoauli ona fai lea o se malologa, ia ona toe amatalia lea i le 7:00 i le afiafi a nanei agai i le 11:00 i le po.*

*Faaluaina e le Minisita mo Faamasinoga ma Pulega tau Faamasinoga ma le Minisita mo Tina ma Tamaitai, Atinae o Nuu, Afioga ma Agafesootai.*

*Na faamaonia le lafo ma tulai ai le Tulafono Tumau 31(1) ua faataatiaese.*

**FOFOGA FETALAI:** Ia e manatu le paia ma le mamalu o le tatou Maota i lenei vaega o le aso, e le faaititia le agaga faafetai ona o le matauina o le faatauaina o le tatou Fonotaga i lenei aso. O lo o matauina pea le toatele ma le anoanoai o sui usufono mamalu ua maea ona saunoa ma faaali finagalo, o le faafetai lena. Ae o lo o matauina foi le taupati mai ma le taumafai o sui usufono mamalu e fia saunoa i le mataupu lenei. Ia ona manatu ai lea ua mafua ai ona faatuina ma pasia le tatou lafo o le faaauuina o le tatou galuega. Ia o le tali atu lena i le taupati mai o finagalo o le tatou Maota e fia lauga i le mataupu lenei. Ia ona ou lagona ai lea, e talosaga atu pea i le tatou Maota ina ia lava papale pea ma faamalolosi mai i le tatou Fono i le afiafi a nanei i le itula e 7 seia aulia le itula e 11. Ia a vaavaai foi a i suaga a le vaatele i le po a nanei o le a lava le mea e i ai ia ona toe fetuunai foi lea o tulaga ina ia atoatoa ma lelei le atoaga ma le taatiaga o le tatou mataupu.

A o lenei ituaso ia alo i o outou faiva manaia, manuia foi fuafuaga o le a faagasolo i le tatou malologa mo lenei taimi i le faaauuina o galuega i lau Afioga i le Taitai o le Malo ma le Kapeneta aemaise foi sui usufono mamalu o le Maota.

*Na faataatiaese Taulumaga a le Fono Aoa o le itula e 1:00 i le aoauli ma toe faaauau i le itula e 7:00 i le afiafi.*